

興國縣志

藝文

第九冊

興國縣志卷之三十七

藝文三

國朝申文

黃惟桂

請復防汛詳文

為請復防汛以塞盜源事竊照興國泰和之界有一險要隘口名曰白羊坳乃四縣之咽喉吉安之門戶也山高路險久為盜賊出入之區

國初以來舊設防兵一營乃吉安分轄汛地而地方常保無虞自甲寅盜賊橫肆遍地烽煙吉安用兵孔亟遂



將防兵盡行撤回撤兵之後各寨猖狂浪川自此多事而秦和萬安一帶民無安居迄今數載地方未靖盜賊不息職此故也邇來各寨雖經招撫尚有寧都永豐之界與崖石接壤時常蠢動夤夜往來常擄萬泰邨鄉若果根株盡除七月內寶石撫目陣奪難婦八口從何而來詳察此賊皆從白羊坳出入竊發無人堵禦之所致今卑職管見仍令吉安設兵一營復防舊汛縱有山賊烏合之衆不能插翅而過卽搶擄婦女不能奮翼而飛我兵固守可以斷其往返絕其歸路此兵一設山賊不擒而自息矣伏乞俯採轉詳飭查舊例原係何營駐防速賜設汛以守險要以塞盜源地方幸甚

上平崖石詳文

爲密陳管見仰佐軍機事竊照崖石一寨實係一郡安危肆掠有年屢撫屢叛各上憲鯁鯁以此賊爲慮仰見憂國恤民之盛心卑職職司守土而地方之情形與逆賊之變詐知之頗悉敢約陳一二以佐勦撫查得各處逆賊皆可用撫獨崖石宜用征勦蓋因崖石十三年叛亂彼時我兵進勦已經乘勝上寨崖逆俛首請降我兵一退伊復跳梁沿今五載搶擄七縣害盡生靈近見吳逆敗滅湖粵蕩平又有搖尾乞憐之態彼必藉口曰已

經投誠矣若果投誠何爲屢肆搶擄見有難民謝克明謝上卿等自寨逃來據供泰和萬安并桃芝難婦見在賊巢以數千計其標下賊頭王老七謝都熊都統領賊衆四處搶劫陽順陰逆惡跡顯然萬一輕信墮其狡術但有地方蠢動勢必乘風而起益鴟張而難滅矣以卑職管見撲滅此寇亦不甚難一要得天時伊寨上糧米有限全取資於寨下若待六月中舊穀旣沒新穀未升青黃不接之日一旦大師雲集據其阨要奪其田糧伊以萬餘家口待哺於峭壁之上不待一月則相殺而食矣二要據阨口崖逆口糧旣絕勢必衝路出圍東則有

寧都兵勇堵其路西則調與國鄉勇堵其口南則有雲都鄉兵把其阨北則有永豐萬泰鄉勇截其後來則禦之去則守之逆賊無糧而食無柴而爨可不攻而自破矣三要裕糧草查崖石山下腴田甚多七月間籽粒將熟皆可收之以養兵取逆賊之糧以供我軍之戰守有不待輓輸而飽騰有餘裕矣以憲臺之勝算超戰將之雄威當楚孽之潰敗仗

盛朝之威靈滅此朝食如縱烈火而燃鴻毛有何難哉竊恐賊謀狡猾見此時勢必且佯爲投降卽以投降而論必須統師臨寨令其削髮下寨挾妻子繳器械離寨

數百里安插別府別縣猛虎離山不能肆其咆哮如此然後於寨上另安官兵永鎮險要或可息盜萌而靖反側矣五年來時勢難行今四處漸平孤寨難恃天子卽取免受其殃此千載一時也伏乞照詳施行

詳禁運軍板害碑文

爲軍民分籍已久刁軍夙弊復萌頌恩轉詳以救予遺以全國賦事案據貢生劉天真等生員鍾汝璉等鄉耆里民鍾崇鐸等具呈前事當經本縣看得興民慘遭兵火荼毒五年殺戮者已成灰燼苟活者僅存皮骨此時卽多方撫綏恐難救藥又豈能當劈空之陷害乎從來

軍有軍差民有民徭各有編冊豈得混板獨信豐所有可駭者康熙初年信豐所軍丁苦於幫運當僉運造船之期板懦弱之民以充軍籍捕風捉影板一人而害一人板一家而破一家誠贛屬之積弊而地方之巨害也興邑因民不堪命於康熙十二年間具控南安府軍廳署興國縣事陳案下備悉旗丁妄板之害蒙查軍民籍貫分別造冊通詳督撫司道業蒙各憲批允勒石以杜牽害見有卷宗在案以爲軍民之編審已明縣衛之籍貫已分憲批霜嚴勒石存照此事已成鐵案矣不期邇來信豐所旗下又板興民爲軍籍內開呂啟初陳春等

名曰新丁若果有此人自當遵解查呂啟初已註遠年逃亡見載信所編冊而所扳呂伏元呂在如徧查興邑絕無此人又報陳春卽陳萬言查陳萬言乃久故之生員因在日曾爲狀首今故害及子孫總之所報者俱係編戶民籍與軍衛風馬無涉一旦扳入旗甲不但目前蕩產誠世世子孫之害也通邑士民盈庭哭號賫册求詳卑職忝司民牧目覩兵燹遺黎無端被害倘不據實代陳難免溺職之咎謹將前任督撫兩院憲暨司道各批并信豐所編審冊籍抄謄呈上仰祈電鑒等緣由通詳各上憲去後隨奉總督部院董批仰布政司會同糧

道查報冊併發奉撫都院佟批仰布政司會同督糧道查報冊併發奉贛南道任批軍籍民籍已經分別造冊通詳督撫司道其批允勒石卷案昭然何物信豐所刁軍敢肆意扳害與民耶仰候院司詳行繳又奉本府正堂萬加看通詳去後隨奉巡撫都院佟批軍民異籍難容紊越信豐所何故捏名違例扳擾仰府卽行該所嚴查報奪繳又奉布政司王隨奉院批行府檄行信興二縣提到信豐所刁軍蔡酉生李時中蕭居政江潑兒劉春旺等併弔集原具公呈紳衿鄉耆里民人等當堂質審蒙府審得蔡酉生李時中皆信豐所運丁狼狽相倚

朋比作奸興邑之民歷被運丁扳害棄糧遠徙匪伊朝夕矣雖屢奉禁飭若輩未能革心去歲乘僉新運乃故智復萌將冊註遠年逃亡籍貫莫可稽考之呂啟初下添寫卽呂伏元呂在如及黃文華悉係鬼名興邑遍查並無其人復捏呂爾載呂啟龍則係東二里十甲編氓也陳春軍冊無名乃久故之生員陳萬言陳玉文此又係興邑北二里之民籍俱經黃令查明取具里鄰甘結在案其爲妄扳平民無疑矣今茲研訊雖彼此互推終不能掩開報實情本應從重究擬念無茹贓各予一杖但據合邑紳士鄉耆控籲紛紛咸求永除民害伏候憲臺俯賜勒石嚴禁庶奸刁厲階從此可戢矣等由詳覆隨奉布政司王會同糧道詳看得軍民異籍無容紊亂刁軍扳害久奉嚴禁何信豐所刁軍蔡酉生李時中等以積蠹老奸朋比亂法屢禁不悛復乘僉報新丁之際混將無籍之鬼名捏報又將興邑之編氓妄扳以致合邑之紳士鄉耆控籲紛紛行據該府嚴提究審妄報情眞供吐鑿據本應嚴加究擬以儆刁玩但據詳二犯並無茹贓且事在

恩赦以前應否從寬免擬勒石永禁統候憲裁緣由奉撫都院佟批蔡酉生李時中以積蠹刁軍捏名扳擾法

難寬假既在 赦前姑如詳免罪發落仍勒石永禁報
繳等因批司行府轉飭信興二縣一體遵照仍將勒石
永禁過緣由并遵依繳報等因奉此本縣稟遵憲批細
將民籍開載於後勒石嚴禁永除板害以安民生恪宜
遵守爲此勒石須至勒石者

張尚瑗

申請發粟濟饑詳文

贛州府興國縣爲饑民粒食如珠農時濟耕無策籲天
詳請發倉借食起死回生事據里民李以達王良萬劉
德亮姚彝敘等具呈前事呈稱云 云等情據此該卑職

查得興邑僻在高山田土瘠薄民間收穀僅敷食用素
鮮蓋藏加以前歲秋冬去歲春夏連遭暵旱吉贛南安
三郡靡不歉收而興邑爲尤甚是以里民具呈哀懇出
借倉穀以濟春耕也竊思常平倉穀原爲備荒而設然
存七糶三奉有成例曷敢輕動卽欲暫時通融亦必得
請而後舉行但贛屬距省千二百里若俟請而後行誠
恐遷延時日坐令數萬生靈枵腹待斃老羸者轉乎溝
壑少壯者挺而走險變生莫測將若之何竊念古人矯
詔發粟開倉平糶往往便宜行事卑職初任地方首以
民命爲重不揣冒昧徑將卑縣交代所受倉穀若干石

暫行減價出糶俟秋成買補還倉其有本地窮民外戶
客籍無錢可買者亦照煙冊量其男婦口數多寡大小
權爲分貸以濟佃耕至禾稼登場卽按數催償再有游
散傭工流移轉徙者卑職現在設法倡捐煮粥施賑凡
此拯饑亟務皆從地方起見蓋積之在倉者原係納之
自民今以民之所納者濟民仍以民之所饋者還官則
饑民全活而倉廩無虧兩便之道也伏覩上憲保赤爲
懷如傷在念是以卑職不辭專擅之咎非敢要譽市恩
事關支動倉穀除一面徑詳各憲外相應一併詳請憲
臺轉詳俯允批行

呈送修建碑刻申文

贛州府興國縣爲敬呈卑縣修建碑文搦本仰祈憲鑒
事竊卑職一介庸愚濫膺百里三年待罪蚊負實深兼
且縣境僻處萬山地盡荒涼俗多舛鄙愧乏展施之術
深慙化導之方竊以創建非常非循分者所敢出而修
舉廢墜實守土者所當爲興國儒學向來雖有先師文
廟而明倫堂缺焉未備是以諸生講道論文率皆墮廢
邑中社稷諸壇亦因鼎革之後鞠爲茂草以致祈報大
典草率弗虔縣城三面瞰水春漲泛溢每有衝激之患
加以甲申丙戌連遭霪雨傾頽甚多至於縣署譙樓觀

瞻所係亦復久圯不葺卑職忝司民社亟思倡建以副
聖天子暨各上憲教養深仁惓惓吏治之至意於康熙
四十三年至四十五年兩次修城於四十四年經始明
倫堂及社稷山川風雨諸壇并縣署譙樓等俱次第鳩
工庀建至四十六年先後落成今者欣逢憲臺仁風普
被凡屬士紳與夫田夫野老莫不欣欣向化共樂春臺
雖末吏迂愚救過不暇何敢自敘勞績然事屬地方興
廢奚容壅於上聞爲此不揣愚昧將前項修建鐫刻碑
文摹刷數冊恭呈憲鑒伏乞照驗施行

請禁時弊詳文

江西贛州府興國縣爲敗倫之惡習當除仰祈憲飭以
維風化事切興邑地處山陬民多固陋兼有閩廣流氓
僑居境內客家異籍禮義罔聞年來仰承憲臺教養深
仁凡有利弊興革靡不殫躬盡職求報稱於萬一然尚
有一二錮弊關係倫常風化而爲習俗所移一往莫返
者卑職業經屢次飭禁第恐誠信未孚問閭罔克遵守
茲特開列上陳伏惟憲臺俯察嚴加申禁焉

一義子亂宗宜禁也民家乏嗣許令同宗昭穆相當之
人承繼如近房無人擇立遠房不許乞養異姓以亂宗
族律文開載甚明興邑積習相沿多以伯道無兒爲諱

潛養異姓之子撫如親生立繼承祧反置同懷子姪於不問是與覆宗絕祀者何異迨至身後或應繼之子出爭或同族之人覬覦紛紛評訟破散家貲其禍甚烈而其所被撫者踞家貲襲宗祀他人骨肉恣意間離本生父母反同陌路春秋所謂莒人滅鄆禮經所謂與爲人後此二弊兼有之矣相應詳請憲臺嚴行飭禁如有犯者按律治罪勒令歸宗其有願爲異姓後而不顧本生父母者卽治以不孝之罪庶天性明而人倫肅矣

一鬻賣妻室宜禁也夫婦爲人倫之首婦人卽干犯七出猶有三不去之條蓋寧使當去而隱忍依違必不使不當去而無端決絕情之所至切亦法之所至慎也與邑陋俗或因伉儷不和或爲饑寒所迫輒將已妻妾作姊妹等項名色轉嫁他人或寫立婚書公行休賣卽有良婦懷慚抱忿不肯改行辱身亦多迫於不得已而去而罔知廉恥者視背夫若棄屣欣然再醮倫常掃地莫此爲甚更有圖利姦徒慣作媒保有如賈販割人妻室不異居奇釀禍敗倫更堪髮指卑職待罪以來此等事情累形案牘相應詳請憲臺嚴行飭禁如有無故棄妻者按律懲治并知情娶納及煽誘作合之人俱從重究擬俾匹夫匹婦咸知人倫爲重不敢輕離庶幾上合天

和而風化得正矣

一棄賣祖墳宜禁也卑幼發掘尊長墳墓及棄屍賣墳地與人律均坐斬夫所謂卑幼雖不指子孫尊長亦不指祖父母父母然卑幼之罪如此豈應子孫無故發掘祖父母父母墳墓及棄屍賣地而反得安然無罪乎與邑每有不肖子孫將祖先墳墓公然棄賣或平治爲園林或作他人墓穴原葬屍骸竟置於不可問其間或有故家舊族經營於數十年之前而毀廢於累傳之後良可痛也相應詳請憲臺通行飭禁如有犯者卽比照卑幼之例嚴加治罪其知情買人墳地者亦照律分別究治庶愚民知有法紀而入土遺骸亦得永安於地下矣

一淺殯開棺宜禁也興邑惡俗大都惑於風水親亡之日屍棺浮土掩埋名曰淺殯經隔數年欲驗地之吉凶復啟土開看卽棄棺而置骸骨於瓦器名曰筋罐以棕葦包裹又曰棕包其情總屬癡愚其事實同發掘查律云有故而依禮遷葬者不坐罪是無故而遷皆有干國典而况掘土開看以致屍骸移動易棺木爲瓦罐棕包豈爲人子者所忍爲乎至於風水之說本屬渺茫暴露親屍希圖已福若有微應獲譴必嚴相應詳請憲臺嚴行飭禁其有將屍棺淺殯復啟土開看者痛加懲治

庶無知愚民不致希冥漠之休禎而蹈目前之顯戮矣
以上四條皆關倫常法紀若不仰藉憲威申禁愚頑無
所顧忌故不揣冒昧具詳憲覽伏乞迅賜批飭嚴行勒
石禁止俾下吏小民永為遵守有裨風化匪淺鮮矣為
此備由具申伏乞照詳施行

申明絕戶屯田應歸民業詳文

贛州府興國縣為棍勢滔天頒憲賞差賚示等事康熙
四十一年九月二十四日奉本府票開仰役云等因
蒙差劉朝賚示到縣奉此隨據佃民鍾引才謝宗顏等
連名具呈為虎軍血佔沈冤莫伸籲天繳示轉詳杜害

事詞稱云等情環庭呼籲卑職查得興邑屯田自前

朝隆慶年間奉憲丈量清查分為活絕二戶其絕戶之
田奉府摘發下縣名佃開墾給帖與之為業蓋為軍絕
不能復續而田荒可以募耕此軍田歸民之所由起也
乃至今日而軍復起而爭之是絕於百有餘年之前而
忽續於百有餘年之後有是理乎且軍之戶絕是軍自
絕之非民之戕害迫逐而絕之也田之歸民又官實歸
之非民之貪婪攘竊而歸之也若軍可以爭絕戶之田
於民則民亦可以爭活戶之田於軍乎再照衛軍之有
屯田以贍運也查信豐會昌二所軍丁向司守禦自奉

裁革屯田起科從無所軍運糧之例而今爲衛軍扳告
現在分任運糧夫駕運則分之於所軍而絕田又欲奪
之於民戶何衛軍之力宜加省而食宜加豐也又據鍾
引才等呈驗歷年完糧印票已歷五十餘年則此田爲
民之世業亦已久矣一旦忽奪而歸之軍是軍固久絕
而必欲使之不絕民實未絕而無端強之使絕恐非民
心之所能甘也是以鍾引才等有泣奏公田冤苦等事
控前院司批府提審未結而衛軍劉啟文等機乘各憲
新蒞卑職因公赴省輒駕詞朦混憲聰又不依奉憲批
發職查究捺詞復瀆稟發告示請飭衙司張掛幸職省
因接奉憲示若一張掛軍必藉以橫行勢必軍民爭鬪
騷動闔邑卑職深以國計民生爲念故特查明公田原
委詳請憲臺或應清查聽民照舊耕種或將鍾引才等
解赴憲臺親詢統祈批示遵行

查造軍田冊籍牌檄

贛州府興國縣爲查造軍田冊籍以便彙核申憲永杜
紛爭事照得興國活絕軍田坵畝四至各有定額毋容
紊亂乃有刁奸之戶倚籍撥給爲名或稱活戶佔絕或
稱民間隱耕或軍與民爭或軍與軍爭上告下控月無
虛日迨至按籍而稽則所告侵佔之處茫無可考蓋由

各軍田向無細冊可查遂致以強凌弱紛爭不已雖其間隱耕漏報者固當加意清整歸之絕戶以濟贍運而刁黠運丁不遵撥冊恣意搜求其活戶軍家侵欺越佔亦非理法之平除民田已有鱗冊無庸再造外所有現在活戶軍田坵畝四至細冊及絕戶軍田現在辦糧收租細冊合行查造爲此票仰該地方練保迅將活戶絕戶兩項軍田星速查明坵畝四址坐落土名及佃人姓名租担數目并辦糧船名戶名逐一分晰造具細冊限日呈縣以憑彙核詳明各憲永杜紛爭此係本縣爲軍息訟至意該練保不得藉詞需索致于重究

請草墟長詳文

嚴查私充牙行等事奉本府正堂朱票行前事票開云云等因奉此案查康熙四十七年十一月三十日據方太居民何正湧等呈爲懇准倒墟杜除禍患以靖地方事呈稱云云等情據此又據城崗居民余簡臣等呈爲懇息草墟以絕匪類以靖地方事呈稱云云等情各具呈到縣據此卑職當查方太城崗二墟雖據該地居民呈稱設墟之害不一而足但其弊源實在墟長應否革除正在詳憲批示間茲奉憲檄飭查除將有帖官牙已經另文着令齎帖送驗外該卑職查得牙戶開行由來

已久至於墟長乃係私立之名非可與評估物價報稅
官牙同日而語興邑方太等處共有八墟原因遠處鄉
民便於就近貿易而設其趨墟趕集之人俱係零星貨
物朝聚暮散絕非開張舖戶之比豈意方太等處私立
墟長以來凡遇貨物到墟無不刻意勒索或一兩而抽
至三四分五六分不等名爲牙用實同紫詐迨奉憲飭
查問其有無領帖非曰已經自退卽曰從無此名甚且
勾引匪類潛入墟場或開賭博攫金或窩私販取利若
地方小有事故卽把持武斷魚肉却愚種種爲非鄉民
側目卽如近奉憲行編聯保甲伊等指爲墟場所屬不
令煙民開報雖經勒令編造一體遵行然其不公不法
爲害民生亦已極矣再如營前江口兩墟離城更遠山
深地僻最易藏奸而墟長之行私斷作奸犯科更倍
他處茲據方太城崗二墟居民何正湧等具呈前來並
請罷墟夫墟場本係便民之事何爲請罷蓋因畏忌奸
民虐焰故不言墟長之患而止言墟場之弊以爲墟罷
而墟長自除也除將現在各墟場應留應罷仍聽居民
自便外所有墟長名色相應詳請憲臺嚴批禁革俾卑
職刊立木榜曉諭民間永爲遵守如有犯者解憲嚴究
地方幸甚民生幸甚

本年月日奉本府批革除墟長名色誠恐有虧課額不
准行等因奉此覆查得興邑額徵落地稅銀向係牙戶
完辦從無空缺且各處墟長把持壟斷魚肉鄉愚甚且
勾引匪類窩賭博窩私鹽爲害甚大相應仍請憲臺革
除再查地方因革總歸便民墟長旣請革除其各墟之
期仍聽小民照常依期買賣等因又奉本府批墟長旣
爲地方之害何不於未查私牙之前詳請革除仰再查
實詳報以憑核奪等因奉此覆查得墟長名色實有害
於民生而無裨於國課至於稅課定額自有官牙完辦
並無虧誤之處總祈憲臺將此項革除則藉名抽勒之
弊可絕等因康熙四十八年七月初六日奉本府批墟
長名色旣稱有害民生無裨國課如詳刊榜革除但不
得名去實存長奸滋弊致干查究繳

申辯銷鹽小票會詳文

贛州府興國縣爲小票未開年分融銷甚屬無憑謹合
詞具詳仰祈憲鑒以絕牽混以免枉察事竊贛屬十二
縣應銷額鹽從無部引到縣惟奉潮州分司用印小票
督銷而分司票內止有鹽劬數目橋商姓名並未開明
係何年分之鹽及融銷字樣至於銷鹽縣分分司票內
皆係空白聽散客自行填註以小票而代引日銷額鹽

由來久矣祇緣潮州分司惟憑橋商混報爲完欠不以小票爲標準凡有足額溢額之縣概以未完報叅所以零都安遠等縣於康熙四十五年九月間在更定鹽法考成等事案內通詳各憲迨奉憲飭查潮州分司又稱安遠等縣銷過鹽餉俱係舊引並非本年之額而所銷票底又稱已經遺失無從查考幸蒙督撫兩憲洞鑒其弊嚴批查飭并蒙各憲於康熙四十六年五月間在欽奉

上諭事案內檄行各縣內開贛屬旣經銷足溢額有分司印票爲據則其確實可知又云贛屬十二縣此後自無枉懼處分之虞等因行縣遵照卑職等捧檄之下仰見憲臺俯恤屬員無微不至鑒定章程而剔弊藪深且至矣其如潮州分司仍以通融運銷之名紛行下屬卽如今年五月間贛屬興國等縣造報康熙四十五年額引全完數目清冊潮州分司以未開額鹽年分又稱橋鹽發運係是融銷復行駁回殊不知分司小票向來並無額鹽年分並未開明融銷字樣今分司忽以年分未開復行駁飭是明設機竄以陷各邑也况卑職等職司銷引止知驗票登號查察官私又督銷引額如未及數卽干停陞降革之例所以凡有小票到縣如係某年給發

者卽爲某年額引竭力督銷以期足額甚而有至溢額者卑職等奉令銷鹽可幸無罪矣若分司以報銷額鹽無有年分遂不作本年之額則當發票之時應卽開明額鹽年分并註明何者爲融銷何者爲額引乃於報完具冊之後紛紛駁飭是誠何心哉茲值奏報之期若不預行詳明勢必仍蹈故轍藉通融報欠之論枉加叅處橫陷網羅爲此合詞具詳并將卑職等銷過足額鹽劬數目冊同散客票底一並呈送憲覽懇祈憲臺俯念卑職等督銷額引止憑分司小票並無融銷年分之處立賜嚴查弔驗分司票底則完欠立見而卑職等感戴憲恩不朽矣爲此除會詳廣東督撫鹽三院鹽法道暨本省贛南道憲外合行具詳伏乞照詳并懇照轉云

會詳張案帑鹽堆貯贛屬融銷文

贛州府與國縣爲帶銷不遵原派經手未定專司謹合詞具詳仰祈憲察重章程正重國帑事切贛屬十二邑奉文召募土商雖於四十六年爲始實於四十七年五月間詳定其間招徠之委曲輓運之艱難奏期之迫促而又有帶銷橋商名年未完餉項陸運司鹽劬種種拮据久邀各憲洞察然卑職等職任督銷惟有竭力奉行以期餉費無虧商民得所何敢稍有推委乃若事情

更變將貽害於贛屬者卑職等不能無呼籲焉竊查康熙四十八年五月二十九等日接奉本府暨廣東潮州府轉奉粵東各憲印票一件特叅道員等事內一欸云張天覺鹽劬發往某縣運到之日該縣出具收管報與委官存照發賣之時該縣卽照新鹽現賣價值聽小販售買價銀赴縣交收張天覺原商家人止許發鹽看賣鹽價不許絲毫經手賣過鹽銀該縣隨賣隨解如不嚴察經收致有缺少者著落地方官賠補又一欸云潮惠各縣引繁餉重汀贛各縣引少餉輕若將張天覺鹽劬於難銷地方一概配搭則難銷各縣斷不能銷若不於

易銷地方融銷則引少之處額引銷完居民豈能食淡合遵部文運往各埠通融銷售張天覺應銷舊三鹽劬押令原商人陸續運至贛汀易銷之處堆貯埠內若無新鹽方准舊鹽接賣此兩說者一係原題所無一係立法互異卑職等亟爲申明夫帶銷張天覺舊額鹽原爲抵帑而設後部議以鹽價短少委員督商運銷亦爲抵帑而設非因天覺虧空之後欲其行私罔利也至於配銷天覺舊三鹽劬係奉各憲按引均配明文具在無所容其增減且贛屬十二邑近奉粵東撫憲加鹽均引而又有四十一二三四五等年帶銷鹽劬正慮銷賣無途

何慮民間食淡至若部議運往各墟通融銷售是指惠潮等四府各埠而言非僅指贛屬而言今借融銷二字欲將惠潮派定之鹽運至贛屬堆貯何惠潮之民不妨食淡而贛屬之民獨能加倍食鹹乎恐部議不若是之偏也若謂贛屬引少餉輕在未經均引以前猶可言也今既奉均引則潮惠汀贛自屬一體何潮惠稱難而汀贛獨稱易乎再照贛屬鹽引昔少而今多非真昔皆食淡而今能加倍食鹹也不過嚴絕私鹽使盡食官鹽耳贛境介乎潮惠汀吉四府之間路徑多岐緝私非易若堆貯融銷之說起無論營私夾帶百弊叢生卽汀贛二十縣之中便多越境衝賺之患疆界無分舊新莫辨隄防之法智勇俱窮譬之穿窬入室不能拒之以不來而第禁之以不取卽日夜防守而欲其纖毫無犯得乎且各邑土商係奉憲行召募一年之餉費一邑之食鹽皆取給於土商此外又有各年未完帶銷餉項一年而完數年之餉一人而辦數人之事商本無多仔肩更重加意撫恤猶憂其困敝今將惠潮均銷之鹽復派於贛屬是使天覺之原商占利於一方置額鹽於難售各爲堆貯不賣實開衝賺之門各爲先新後舊實啟誤新之兆矣卑職等害切剝膚不能嘿嘿相應剖晰具陳仰祈憲

臺迅賜移咨粵東督撫鹽三院將贛屬堆貯舊三之議
卽賜寢止所有張天覺鹽劬仍照原派數目均於惠潮
銷售庶於原題無悖而商民均有利賴矣至經收鹽價
一欵卑職等自當遵奉憲行以期無悞但文內止令卑
職等隨賣隨解並未議及賣鹽經手何人若令卑職等
出具收鹽收管又令原商家人發鹽則事出兩岐而卑
職等雖身任經收亦止能收銀起解造冊報數不能親
赴埠中作馴僮之行若欲責諸經胥未奉明文何敢擅
便所有帶銷天覺舊三鹽劬應着何人經手發賣及卑
職等旣出收管原商家人應否免其發鹽以專責成之
處更祈憲臺移咨一并裁奪示行

陳三元

請復中學申文

康熙五十六年十月二十九日本邑紳士廖應梓等以
懇詳請題拓學爲中等詞具呈在縣十一月初六日詳
據呈興國縣知縣陳看得人才之盛自古爲難文教單
敷於今爲最我

皇上臨御數十年樂育斯文訓飭士子其所以鼓舞而
培養者靡不周至是以遐陬僻壤咸知誦讀村童牧豎
盡識詩書誠亘古一時千載所未有也江右去京師不

遠

聖朝雨露沐浴尤深更逢各憲體

聖天子之德意菁莪造士樸棧作人雖嚴疆下邑莫不
駸駸向化有民社之責者何敢不益加鼓勵以宏

盛治查贛屬十二縣稽其國賦則贛縣地丁不下三萬
兩寧都不下三萬餘兩興國亦不下二萬餘兩並稱大
縣至於歲科兩試入學額數其贛寧二縣仍照大學各
取十五名信豐龍南二邑地丁錢糧僅載一萬有奇或
不及萬兩取進童生亦照大學額數又雩都會昌瑞金
長寧安遠五縣地丁不滿一萬兩取進童生各十二名

俱照中學額數惟興國則與石城定南二小縣一例取
進童生八名其間賦役既有多寡之殊似應就賦役之
多寡定入學之成規况興邑戶口較前日繁讀書子弟
現今日盛入學限於額少孤寒上進維艱合無請將縣
邑小學改爲中學廣額四名俾童生進身有階不致格
於成額將見士心益奮而士氣益伸矣康熙五十六年
十二月二十六日奉總督部院常批據興國縣詳據士
民公懇申詳將興邑小縣改爲中學廣額四名緣由奉
批仰江西布政司確查通報等因批司奉此合就抄詳
檄行備票行府卽便查明興國縣請改爲中學情節可

否詳請具題酌議妥確具文詳報以憑查核通詳毋得
遲延計粘抄詳一紙等因奉此合就轉行爲此仰縣官
吏照票事理卽便查明該縣請改爲中學情節可否請
詳具題酌議妥確以憑查核通詳云隨該興國縣陳
三元覆看得贛屬十二縣惟贛縣寧都興國三邑爲最
是以論錢糧則稱大縣而歲科兩試取進文武童生定
爲小學之額上之旣不得等於信豐龍南二邑與贛寧
而並爲大學次之又不得等於雩都會昌瑞金長寧安
遠而爲中學僅與石城定南二小縣列爲小學者卑職
備查其故蓋因鼎革之初興邑屢遭兵燹庠序荆榛人

民逃散斯時應試者少前順治十七年學憲樊按臨考
校童生應試者寥寥以致原係中學降同小學嗣後流
亡復業戶口殷繁前任知縣何令張令疊據紳士呈請
復學爲中經張令於康熙四十五年詳請未蒙題准至
今五十七年又已十餘載恭逢各憲加意造士興邑人
文藝前愈盛若格於定例仍照小學取進童生八名則
衡文學憲不能破格拔才未免遺珠致歎抱璞興嗟是
亦

聖朝之闕典也事關作人卑職身在地方不得不爲仰
懇憲臺俯從紳士所請轉詳請題將小學復爲中學因

時制宜庶文治有光學校幸甚奉檄飭查擬合具文詳覆核轉爲此備由同書冊具申

康熙五十八年三月十六日准禮部札開儀制清吏司案呈奉本部送禮科抄出本部題請前事內開該臣等議得江西學政王疏稱贛州府興國縣賦役與大縣相同向止定爲中學又緣昔年應試童生寥寥無幾遂致降爲小學迨後昇平日久戶口殷繁讀書好學者雲蒸霞起是以興國童生十倍於前而額數僅同小學合邑紳士廖應梓等具呈公懇轉籲

皇上天恩念其人才倍出復學爲中以宏進取誠與江南南陵中學改爲大學之新例相符會同江南江西督臣常江西撫臣白合詞具題前來查康熙五十七年二月內原任江南學政林疏稱中學之南陵縣賦稅加於涇縣之大學懇將南陵縣之中學改爲大學臣部議覆將南陵之中學改爲大學照例考取童生具題奉

旨依議在案今該學政王旣稱興國縣賦役與大縣相符應考童生十倍於前等語應如該學政所請將興國縣之小學復爲中學照例考取童生可也康熙五十八年二月初五日題本月初九日奉

旨依議欽此到部相應劄行該學政可也爲此合劄前

去遵照施行等因到院准此除移會督撫兩院外合就
檄行備牌仰職即便呈堂轉移各司道併行贛州府轉
行欽遵施行等因轉呈到司據此合就移會爲此備咨
貴司煩爲查照併轉移驛鹽饒贛各道一體欽遵施行
等因准此合就移會爲此備關貴道煩爲查照欽遵施
行等因到護道准此合就轉行備牌行府查照司移事
理一體欽遵施行等因奉此合就轉行爲此仰縣官吏
照牌事理即便移行儒學一體欽遵施行毋違須至牌
者

孔興浙

請增書院膏火詳文

贛州府興國縣爲恩餘裁給德洽潛修事乾隆十五年
九月日據生員王敬售鍾一鴻謝丹五胡作雲童生蕭
韻清鍾勳郭葵等具呈前事呈稱云等情據此該卑
職查得興邑生童沐憲臺作育之恩設立義學前令金
履寬詳定於上官戶公租內抽穀十四石并學前地
租六兩以爲延師脩脯之資伏查興邑自宋太平興國
七年建縣程大中公諱珣首宰是邑率先賢兩程夫
子從學濂溪流風餘韻至今數百年未墜但僻在山陬
士習樸茂有餘文學不足卑職奉委蒞署斯邑念多士

有可受教之地而未能廣益教思上無以仰副

聖天子崇學右文至意實切滋懼卑職雖才極駑鈍竊

圖愧奮爰於到任之後卽詣書院瞻仰先賢條列學

規捐備供給每月三期考課甄別勤惰雖膠庠弟子敦

尚樸魯而數月以來文學漸開多士知奮但規模初具

膏火鮮資卑職五日代庖不得不爲善後之請茲據各

生童呈懇情切查興邑公項原有上官戶內公田租穀

一百三十六石九斗零已經前令詳准歲支二十四石

爲掌教脩脯今仍懇請於此項租內每年撥給穀四十

八石以爲諸生膏火之資庶三程過化之地可彷彿鹿

洞鷺湖於萬一青藜普照藝林文教軍數多士沾沐憲

恩羣泮肌髓現在修輯志乘亟望恩光永垂梨棗所有

多士微忱卑職未敢擅便相應詳請憲臺俯賜查核批

示除徑詳藩憲外爲此備由具申伏乞照詳施行隨奉

本府劉批旣經具詳藩憲候批示飭遵此繳本年十一

月十三日奉本府牌開十一月初五日奉布政使司彭

批前事查興國縣義學膏火久經詳定有數今遽請加

增是否可行仰贛州府查明妥議詳覆繳等因到縣奉

此該卑職覆議得興邑書院旬有考課諸生晨夕鍵戶

潛心俱知實力向學第負笈從師率多寒士焚膏不繼

未免向隅且涵育薰陶必經年久歲深又非旦夕捐給
可以畢事卑職悉心經畫誠有不得不據呈懇請撥給
公費以宏作養以垂永久者查興邑公項有上官戶田
租已經前令金履寬詳准歲支二十四石爲掌教脩脯
更懇於此項租內撥給四十八石以爲諸生每月膏火
之資在寒士權衡盈縮實無浮濫並可經久如蒙憲恩
批允並請訓示嗣後肄業諸生務責有司延請經師每
月實心考課按季甄別勤惰註冊以定去留如此庶三
程過化之地可冀風氣日開而且視朱陸鹿洞鷺湖之
勝益爲西江生色矣緣奉飭議是否有當伏候憲臺俯

賜核轉

云

奉署府李批候轉詳藩憲批示飭遵此覆

十六年四月十九日奉分巡吉贛南道兼攝本府事施
牌開本年四月十五日奉布政使司王批前護府呈詳
前事奉批候轉詳院憲批示飭遵繳五月十三日奉分
巡吉贛南道兼攝本府事施票開五月初五日奉布政
使司王憲牌內開四月二十日奉巡撫部院舒批本司
議詳前事奉批如詳轉飭遵照仍飭該縣實力奉行不
得始勤終惰藉滋糜費虛冒致干未便年底將師生姓
名收支各數彙冊送查繳等因行司到府奉此合就轉
行爲此仰縣官吏遵照憲批事理即便知照實力奉行

不得始勤終惰藉滋糜費虛冒致干未便仍於每年底將師生姓名收支各數造具細冊五本具文送府以憑查明轉送藩憲核轉毋違

夏璜

書院延請本地山長詳文

贛州府興國縣為潑江書院公議延請本地山長懇恩轉詳事嘉慶二十四年六月初三日據舉人劉逢昌拔貢生謝鶴齡歲貢生呂承燮生員鍾熙瑞等具呈前事呈稱云等情到縣據此卑職查得興邑潑江書院向由本縣就近延請山長茲據舉人劉逢昌等以近年各

憲推薦山長來自外郡到館較遲兼之脩俸微薄難以久留往往馬帳甫開驪駒旋賦肄業生童無所統率未免任情作輟請照南昌東湖書院寧都梅江書院之例專延本邑宿學紳儒庶可長年訓課聘定後仍稟明稽考似於造士之道實有裨益如蒙憲恩俯准即請以庚辰年為始仍遵照前撫憲金及鹽憲通飭於仲春啟館至十一月散館每歲脩膳分為四季支送若山長不依期開館或半載內託故辭去即將餘存脩金另請名師代課以免懸曠仍令約束諸生安分自愛不得瞻徇梓誼聽其盤踞唆訟遊蕩滋事理合具文詳請憲臺俯賜

察核示遵伏乞照詳施行隨奉本府吳贛南道張鹽法道胡布政使司瑞俱批候撫憲核示又奉巡撫部院錢批據興國縣詳繳江書院聽該邑紳士等自行延請本邑山長主講緣由現奉

上諭各屬書院務延經明行修之士主講毋得濫竽充數通行欽遵在案據詳前情仰鹽法道核飭遵照此繳

興國縣志卷之三十八

藝文四

宋文

郭知章

字明叔龍泉人翰林學士

改遷儒學記

國家承平日久鼓道德以覆被天下之俗將使混然一之而純粹矣然郡邑相環其習尚往往稍異何也世之為說者以為生質有厚薄風氣有媿惡不可得而遷徙誠如是教之無益也詩書仁義殆為人之駢枝尚何為耶不知人之才固非白異患乎長之者未能固其教也

朝廷詔郡邑通立學意亦至矣而不可繩以法非若刀布簿書抵其職之稱否而黜陟之苟知自畏者莫不認認焉砥礪以赴功而懼才力之不足以勝彼學校者獨存乎法之外誰自刻意而勉爲之幸而有勉焉不幸而非其所好幸而有好焉不幸而非其所樂是以民之材可以適善而與之適善者難能也興國爲邑雅號劇盛民往往挾氣尚鬪幸其富而安閑亦有學者百餘年因循持久尚未有以學校開歸之良可嘆也治平元年夏殿中丞何公蒞邑越三日齋被謁先聖廟見其卑陋殊甚而二時薦祭簞簋籩豆之器皆壞腐僅存名數公憮

然曰夫學孔子之道非敢私焉必將廣其教今所謂廟與器尚不能嚴而飭之教將焉在予甚爲學孔子者愧然民訟紛積而吏弊深以牢方銳意壅遏攘拂之學校以此未暇及未幾政皆有條理而人莫敢違令公曰可以教之矣其年冬議遷舊學於縣門之北規度墁地廣袤適相宜又得民之尤喜事者願致私緡以助凡工費皆資焉明年冬學成有殿斯巍有堂斯煥至於東西兩廡齋庖之所無一不稱何其盛哉非公自然而樂之能及此耶愚嘗聞有而能充之者君子之性充而能廣之者君子之教予思曰率性之謂道修道之謂教是也然

興國縣志 卷三十一 宋文
性所以成已教所以成人性所樂也教亦所樂也况得一邑粗可以教其樂則詩書仁義之道何憚而不昇斯人耶宜乎公之立學獨能適意於法之外也將見興國之士被服儒術者相與翱翔游泳於其間治心養氣正其所習期純固而闕肆一旦聯裾而起皆所謂傑然之才上可以宜朝廷之器使夫然後知學之效如此其至公之樂又如此其遠矣經始而成之者邑尉張喬卿也論撰而刻諸石者門生郭知章也

朱夢龍

興國縣尉

莊明府生祠記

遍天下大縣四十其隸於江西之贛者二而興國居其一氣習剛悍勁險尚氣喜鬪令苟無慈愛誠懇之心以蒞之爲一切之政吏縱不肅則曰事倚以辦民困弗蘇則曰公取以足豪強有力惟姦弗治貧弱孤幼雖直弗伸翫歲惕月習爲故常天子有勤恤之詔迎宣拜伏視爲文具致使不安其政持吏短長而猥曰贛之民難治是豈真不可轉移者哉慶元五年春溫陵莊公被命來尹至之日考察風俗利病不任術數專務教化留意庠序典其教事課其優劣而陞黜之間詣公堂講貫經理與之酌酒賦詩宴譽終日士皆退自矜奮期不負公教

辛酉大比上賢能之書凡三人而壬戌登進士第者一人自受縣以來未始有也縣以雙日受訟牒訴倍百公隨事勸儆嚴反坐之律庭無留訟前此常賦病不足或椎剝充數胥吏並緣苛取公悉除罷惟省究簿籍檢梃欺蔽嚴推罰定租賦而財用以裕鄉鄙牛斃舊例責民納錢代筋角聽民解剝公爲痛革其弊凡盜殺者坐如律全活不可勝計縣庭棟橈梁壞公裁約浮費經度就役隻椽片瓦不斂及民又以餘力并班春宣詔二亭而新之人稱其瓌壯縣與吉之永豐壤地相錯有孫六者夜毆其妻妻勿孫夜昇屍越入縣境黎明謹報鄰里以爲羣盜掠殺其妻抱狀來告上官文移督通甚急彼縣巡尉不得其端倪乃移逮孫六聲言自興國界至公密令人視其家則土屋繩樞死者蓬頭禿頂乃呼孫面詰之曰盜何所利而劫汝屋掠汝妻乎遂一訊而情得庚申秋旱有葛姥祠去縣八十里公躬禱焉觸熱踰嶺窮日不能達詰朝盛服撤蓋徒步至祠下薦獻甫畢陰雲四合驟雨逼近郊年用屢豐縣令有漆給公却弗受積至九十餘萬錢常閱常賦之籍有下戶逋欠會計五十三萬惻然憫之悉爲代輸其餘則并以給公家之用公之爲邑一出至誠不爲表襮簡靖平易優游絃歌而仁

風德澤周浹於封內嘉泰二年二月既望公秩滿受代
 有日邑之士庶相與謀繪公像立祠於學且伐石誌其
 事屬夢龍記之夢龍謝之曰公之盛德炳若日星其善
 政不可勝書書之且不可於公之心士庶請益勤曰公
 雖不欲吾民其可已乎矧公政成東歸自是羽翼天朝
 均福天下將天下鼓舞之豈特吾興國之民哉夢龍痛
 其意敬援筆直書俾鑱諸石庶後之見者知其為勿翦
 之甘棠云爾公名夏字子禮淳熙辛丑進士其文章學
 術正大粹美夫人類能言之故不著

上

甸

興國主簿

瞻學鈔記

地之美者善養禾君之仁者善養士推廣君心之仁而
 惠及都邑者賢守令責也我宋重儒尊道學以居之廩
 以育之君心一脉之仁如水行地中無往而不在者皆
 守令推廣力也興國自建邑以來學舍備而稍食闕紹
 興中蔡侯世美請於朝欲於人戶入納二稅每鈔官收
 內撥出足錢一十文載之赤歷儲之縣帑為養士費士
 有俸自茲始也歲既久黠吏因緣復於瞻學錢外陰取
 一十文足紹定己丑寧石草竊殘燬我郭郭連歲俶擾
 錢鈔附於縣帑縣家多以綱解有虧於是乎有支移借

用之弊士所得日以慳而皂隸陰取之錢毫末無損士不能平訴於上臺願以吏之所取與贍學之費俱寢部使者從其請士失養者今五載矣吏姦莫過舊貫尚仍今年春番陽趙侯來首重人才愛護善類每入學顧黌字欽頌青衿寂寞喟然歎曰何吾道之若是既審其所以乃呼吏而鞠之具得其情謂士且無養而吏得自豐遂取魁黠者力懲之衆皆悅服於是人戶入納大鈔所收二十八文足小鈔收八文足皆縣用合得以支遣者悉捐此錢以十文足今爲養士費補前日所任之錢委主簿王旬掌之餘以修學修城委尉項公演掌之以文報於學士皆額手曰昔蔡侯之意固美而取之於民所以末流不能無弊今尹不加賦於民而士得其養吏革其姦意美於蔡侯多矣南山可移此判不可動第歲月遷易案牘湮沒又安保吏之不復侵漁乎學職乃相率告曰願勒堅珉以詒不朽予曰侯所以養士者至矣而士之所以自養者當何如大學曰未有不仁而下不好義者也儒行曰儒有見利不虧其義是以教學相長禮樂相規如是之謂義朋友有信進修有常如是之謂義苟知此道然後無媿於自養侯以仁養士士以義自養仁義之風藹然交暢興邑自此殆將化爲鄒魯之鄉

矣然則多士德侯之賜豈止今日而已哉

李昌吉

程大中祠記

咸淳元年秋七月興國宰南海錢公大修學宮增置學廩以惠多士崇教化也既而謂大中程公嘗令於斯明道伊川二先生嘗侍於斯而寓敬無所非闕典與乃度地於講堂之右屋而像之父居中子左右侍祠惟以大中名統於尊也嘗考大中之爲宰實慶歷四年時伯子年十三叔子年十二既二年而攝倅橫浦始識濂溪周夫子而命二子師之濂洛授受之懿自興國始故嘗以

爲大中之爲政其他可能也其識濂溪於衆人不識之中遂使聖人之道煥然復明於天下是難能也然則是邦有祠豈特表甘棠之思已耶雖然祠大中而及二先生賢令尹之意豈無所謂乎天下惟道最大長民者疲心於簿書期會之末而不以道淑其民薄其民者也爲士君子者馳心於富貴利達之境而不以道淑其身薄其身者也是祠之設徒祠云乎哉佩衿濟濟攝齊而升見二先生之像則當思二先生之道此則賢令尹以道淑民之本心也嘗試登斯堂而慨想其遺風雖生也後不及親炙河南之門而坐間之春風門外之雪師模氣

象可彷彿而識也格言大訓具在簡冊雋味淵永可紉
繹而求也虛心涵泳切己省察致知以明善持敬以崇
德去其不如程氏者就其如程氏者今而後其必有心
領神會超然自得繇伊洛以溯洙泗之淵源者矣昌吉
不敏願與諸同志勉之庶無負我公建祠之意云公名
益字良輔吳越忠懿王九世孫擢淳祐辛丑進士第其
所學蓋根諸理而有得者觀其爲政之精密嚴恕可以
知其德矣

文天祥

字宋瑞廬陵人右丞相信國公文山集

安湖書院記

贛興國縣夫子廟在治之北門縣六鄉其五鄉之人來
游來歌被服儒雅東一百里曰衣錦鄉其民生長陡絕
險塞或爲龍蛇瀆於邦經有司常黽勉以惠文從事咸
淳八年宣教郎臨川何時來爲宰憫然曰使人不可化
則性之道總矣顧邑校曠越教不克施廼夏四月卽其
地得安湖山水之勝議建書院以風來學召其豪長率
勵執事堂庭畢設講肄有位彙試館下錄爲生員二十
八人又拔其望四人爲之長冬十一月令率諸生以牲
幣薦於先聖先賢尊俎旗章等威孔嚴環觀愕胎屏息
胥忭黎老婦子轉相傳呼而後翕然以儒者爲重令曰

吾教可行矣載命胥正秩其比伍家使有塾人使有師如黨庠術序之意置進學日記令躬課其業督以無怠以上諸府改其鄉曰儒學植其風聲於是山長谷荒人是用勸咸賴進嚮文事率由訓程傳曰天地之道浸言化以漸也風俗之積幾千百年而令一朝變之固若是速與恭惟國家五星聚奎實開文明皇祖詔立學其後復創書院三代以下斯文彬彬焉先民有言地氣自北而南粵從衣冠正朔啟我吳會自江以南悉爲鄒魯今也遐邇僻壤沐浴教思如狂得瘳如迷得呼王澤之滲漉日深地氣之推移日至此豈偶然之故哉予於令爲

同年進士適守是州今奉天子明訓以字民爲職能廣學宮宣德化是不爲辱威命守將上其事於朝復諭之諸生曰昔有文翁興學於蜀受業博士時則張叔學官弟子吏民懷之彼何人哉叔兮叔兮又進諸生之長論之曰昔有文公設教於潮潮人趙德以士見招維文與行倡於齊民其則不遠德哉若人諸生拱而前曰某等幸生明世惟師帥不鄙彝之俾獲有聞雖不敏敢不受教請刻諸石以詔百世書院之制前爲燕居直有杏壇傍爲堂左先賢祠祠後爲直舍繚齋以廡不侈不隘臨溪爲門堂名絜矩齋曰篤志求放明辨主善率性成德

其門總曰安湖書院予山中所題云

方逢辰

字蛟峰遂安人吏部尚書

三程先生祠記

贛州興國地雖僻小實先賢仕國也慶歷甲申大中大
夫程公珦以大理寺丞來知縣事二子侍公學焉越二
年丙戌由興國攝倅南安識濂溪周元公於理掾以二
子師之則明道伊川二先生也明道生於明道元年伊
川生於二年侍乃公在興國時明道年十三伊川年十
二國史傳曰明道自十五六時與弟伊川聞周茂叔論
學遂厭科舉業慨然有求道志蓋此時也咸淳十年吾
友臨川何時字了翁試邑於斯考往牒知爲大賢過化
之邦二程子始學之地景行先哲乃矧書院於安湖於
講堂東奉大中公父子祠以元公侑之二千里走書介
入嚴陵山中語予曰江西爲周程傳道受業之所實自
興國開先焉子爲我一言以發濂洛授受之微旨以開
斯人逢辰竊惟聖賢之學自孟氏後無傳距慶歷凡一
千三百五十年而周程出焉非元公無以傳絕學於千
載之不傳非大中無以識元公於衆人之未識故祠以
大中主之元公配之二程子侍焉若元公之面命以授
而二程子之捧手以受者此爲何物太極一圖不以語

他人而獨以語二程子及二程教人專以語孟中庸大學爲主而未嘗一語及太極或遂疑其非元公之書而爭辯紛紜至今學者猶自相柄鑿嗚呼夫所謂太極其盡在圖也不窮理之所自來則滯於形器之粗下而不足以爲造化之樞紐品彙之根柢不體理之所實在則淪於空寂之高虛而不足以貫本末而立大中該全體而達妙用天之所以高地之所以下陰陽之所以動靜此何物哉必有爲之主宰者未有天地未有民物以前又何物哉必先有是理而後有是物也周子將教人以窮理之所自來不得不探天地之根萬化之原以爲言

故曰太極又以其形形而實無形也故曰無極而太極二程子將教人以體理之所實在則不得不就日用事物切近者以爲言故曰道不離器器不離道二程子不言太極乃所以詳言太極之無往不在也何也入孝出弟徐行後長卽太極也桑麻菽粟日用飲食卽太極也出門如賓承事如祭卽太極也爲堯舜則揖遜爲湯武漸去魯則遲行爲乘田則牛羊茁爲委吏則會計當卽太極也語其隱則上天之載無聲無臭語其費則卽事在事卽物在物程子之言道器其得於周子太極之說

項國鼎志 卷三十一 元文
歎逢辰不敏姑以是復何君之命

元文

吳

澄 字幼清崇仁人翰林學士諡文正草廬集

題安湖書院結末後

漢循吏化潢池弄兵之赤子賣刀劍買牛犢史傳以為美談吾樂安何侯初登進士科尉廬陵已著吏能嘗臨江錄曹仕彌進彌優及宰興國建安湖書院於邑之衣錦鄉敦以詩禮能化一鄉素不可化之俗訖今不復弄兵雖漢之循吏何以尚茲於呼士君子有志斯世大而宰天下小而宰一邑皆可以行志願其人何如耳斯高

用而盜賊遍山東林甫國忠用而盜賊遍河北幸以亡秦而亂唐一郡縣之小用得其人則如此以天下之大用不得其人則如彼人才之有關於斯世豈小哉天下不難治也安得如侯者千百布滿郡縣哉侯諱時字了翁人稱見山先生采李侯之同年進士安撫江南西辟侯主管機宜文字朝命提舉江南西常平茶鹽事不及上未幾銜石填海之志不遂匿姓名曰野白道人市藥民間數年後還家以壽終

劉

崧 字子高泰和人國子司業槎翁集

興國陳令尹德政頌

癸卯夏四月南平劉某遭兵亂奔逐蕩析聞鄰邑興國
有賢令尹也自其鄉徧徇百四十餘里往觀政焉入其
境田野治而民自謂未嘗見吏也入其關商旅嬉而民
又謂未嘗見盜也老者盱盱幼者于于居者以愉行者
以舒旣而游於學聞絃誦之聲適於市聞與人之歌乃
踴躍感歎自傷僻遠不得爲其民以少漑一日之惠則
又欣欣然爲興國民獨得賢令尹喜且賀之於是稍撫
與人之歌畧正其音節而爲之頌焉頌曰萊田之昫昫
兮我則治之孰貸我牛與種兮陳侯是資居室之翹翹
兮我則修之孰畀我椽與甍兮陳侯是周野有猛獸噬
人血顧孰與逐之有仡其徒羣狐睢盱或窺我室孰與
拒之有截其屹我有瘡痍侯摩撫之我有苦饑侯來哺
之訓我子弟養我父母以燕則佚以善則不侮爾工爾
賈爾田爾舍聞聲趨風咸至庭下庭絕更符曾不逮呼
役有定程賦無宿逋侯馬來止在泮之泚鼓絃詠詩樂
爾君子侯車出遊在彼中洲擊節揚旗安歌以休牢有
羊豕池有鱣鯉伊民之生惟陳侯之惠矣贛有十邑惟
陳侯是茂民曰噫嘻昔未會有朝有袞黼廟有鼎彝毋
詔公歸伊民之師激江沅沅方嶺奕奕我輯輿歌永播
無斁

興國修城樓記

歲癸卯正月甲辰興國縣旣浚城之隍乃三月甲寅又大修城樓戰屋示戒備也城爲門者五門外復各爲甕城以包絡之設重關焉內爲正門累石立礎上出重屋凡若干楹高深各若干尺城周圍三餘里三十步復爲列屋以周覆之凡四百六十有三間一千八百五十二楹工役凡若干食粟費若干由是垣墉環顧廬舍翼張土石無圯裂漂蝕之虞居而守者無風雨矢石之慮凡遊其中者如行通市如息廣廈瞻其外則將將乎其嚴正奕奕乎其聯屬而不絕也縣雖小城不亦壯矣乎於是西隅蔡某以嘗從事於屬工之役也則來求文以紀陳侯之嘉績余時過而見之其何可辭夫城所以域民而保險也而其患嘗在於難守而速壞旣浚其池而立之門矣又重護以甕城之固旣建重屋於門之巔矣又周覆以列屋之深豈非防患於幾微貽慮於久遠必不使斯民有一日之弗安者矧儼然萬山間翬飛鰲峙又有以折其凌噬之心而起其敬畏之意者乎侯之用心亦勤矣是役也用民之力而不自以爲勞因民之財而不自以爲費何也役興於上而利達於下故也侯字文彬清江人明敏剛果而綜理周密蓋能憂民之憂者也

興國縣志 卷三十一 元文
爲政先備類如此

興國修儒學記

清江陳侯某爲興國之三年旣覈賦均役繕城籍兵保完邑民拒逐鄰寇矣乃大修孔子廟學將無圯於後有加於昔關阻夷隘增崇拓深以仰稱聖人尊嚴之居以申崇諸夏文明之教以無負方伯擢任之意以無隳邦人彝性之常侯爲政誠知所本哉按縣學在縣北隅負山面城外門俯迫民舍紆道旁出前未有闢之者其正殿門廡中更修葺僅完獨講堂嘗以他材改爲之傾壓將弗支而曩時所謂尊經閣在講堂後高阜者已蕪沒

不可考矣侯惻然曰是不可以諉邦人也卽考圖營基度材庀役首撤大成殿簷阿之撓腐高揭而重覆之北爲尊經閣以度羣書下爲講堂凡十有幾楹高廣若干尺南爲櫺星門又南創爲泮宮亭亭之前鑿地爲池規其半倣古泮宮之制正途中闢直臨城陰庭陞之高蓋可仰而歷也戟門左爲廳事五楹以居春秋朔望之有事者又有廩屋若干楹兩廡之比爲齋居東曰棗西曰某閣右偏爲二程先生祠左爲先賢祠又左爲學官廳爲庖湑之舍東廡之前隅則靈官祠在焉其他朽腐者易之漫漶者飾之傾偃者葺之而規制極宏備矣禮名

儒以爲之師立學規暇卽躬造講庭引羣弟子考程詰
義至懇懇不倦他日察其勤者則加燕勞給筆札以優
異之由是遠鄉僻壤不遠數十百里咸遣子弟來學旣
又懼學賦之玩弊也乃遣士屬視田之隸各鄉者圖其
廣狹方圓之形編以爲籍使不得欺又勸增新入之田
若干石又築學東之隙地爲僦屋凡十有八間間爲僦
錢歲率五緡通計之得九十緡收其入爲養士之助其
立心遠且厚類如此夫嚴聖人之廟祀者尊其道也尊
其道所以崇其教也其道君臣父子夫婦昆弟朋友而
教者所以使之循其常也自兵變以來紀綱或淪於殘
暴而仁義未泯於天性非賢守令有以尊崇而作興之
吾未見其爲善化也方侯下車之初四郊警告適聞日
慄慄焉率其民以從事於樓櫓矢石之間瀕萬死而守
益固故寇再至而再卻之旣而極更張條理以還定其
民而日不暇給矣此廟學之修所以見於三年之後計
侯之心曷嘗一日而忘斯舉哉今顧瞻新庭翼翼巍巍
聖神赫臨過者起敬而况儒其冠裳出入是門由是路
者亦曰孝於家忠於國敬於己信於友而已斯聖人之
道也令尹之所以教也斯邦人父兄子弟之責也寧徒
誇輪奐之美餼廩之豐而已哉是役也經始於某月日

告成於某月日董其役者邑儒士某某也

旌陽道院記

三台山在興國縣西一里而近有三峯焉其中峯蜿蜒委蛇東北行西西復折而南峙故謂之三台或曰三臺山故爲道觀有遺跡焉先時土人居其旁見夜嘗有火光乃去之旣而邑人有鍾生者頗慧而好修與洞清治平觀之道士曰楊質以誠曰王謙順聖曰劉會時憲者遊旣而得淨明忠孝之學將施其地結茅其上祀旌陽而講習焉旣闢地矣會兵亂而鍾生亦捐館乃不果癸卯春邑尹清江陳侯某觀射於西郊過而登覽焉愛其深窈高曠因贊之曰是可以祀旌陽矣乃卜日審向夷高塞圯廝地數尺得古銅器於槁壤中人咸以爲異旣而柏表而靈鵲嘗挾石而甘泉發元風始倡嘉應咸集乃度材庀工首爲正殿三間祀旌陽許仙其中而從以玉真劉真人暨諸宗師前爲三門旁列兩廡東爲講堂後爲道寮又東北爲亭曰放鶴又爲雷壇於後山之頂復爲亭曰看雲然後是山之勝無不畢獻而元宇之成日備經始於某月日告成於某月日侯綱維之力蓋勤勤焉余聞西山玉真劉先生初傳淨明忠孝之說於許仙其所謂降臨會遇者余不得而詳之惟忠孝者天之

經地之義而民之行亘古今天下人之所以爲人仙之
所以爲仙者修此而已矣此而弗修人且不可爲而况
於仙乎故淨而明之又學者之微旨也而陳侯所以表
創於茲山者亦曰誠心之發而忠孝之感焉耳則後之
居是山而奉斯祠者宜益有所興起於方來矣以誠元
悟穎異而疎放不羈與人交其語默去留恆不可測然
聞有高尚之士雖百十里不憚風雨寒暑以求卽之否
則終歲與居而名姓不知也又平居好援古今陳說忠
義人有過至面折不忌時喋若醉語及與之飲乃終日
未嘗醉常攬一布袍飄飄然行歌市中童子或指之曰
顛也往往大笑而返其類有道者歟順聖時憲與其徒
黎日昇又能力耕山下田以自給至輟耕卽讀書不休
其才質之美蓋故儒家子云

長春道院記

古遺世長往之士恆有休憩修習之所彼豈擇而取之
哉感化而冥合聞風而景從蓋有非偶然之故者若今
長春道院之建是矣方之外有蒲衣道者曰方邱生蚤
遊臨川吳文正公之門旣而師事李西來於武夷山學
全真之學西來者故金蓬頭之高弟子也从而去之居
龍虎聖井山之天瑞庵又去之浮遊江湖見東魯能仁

叟參明性命一致之要其說與金契復歷叢林究竟宗旨後得安成之武功山築室其巔若將終身焉一日忽棄之去衆咸駭之未幾兵起武功燬去而之豫章又將歷崆峒踰梅嶺登羅浮以絕於南海其言曰吾教以清淨無爲爲宗旨以一瓢一笠爲身具昔有邱長春吾宗師者其教將自北而南他日由嶺之興國見令尹陳侯與語大奇之乃止之曰子雲水徒也一山一水無不可以遊息者何拘拘乎羅浮之求哉一日避南郭登金雞冠嶺而眺望焉人云其下嘗爲鍾氏圃曰芳■長春者寢矣生聞而歎曰茲長春遺識乎瓢笠之緣其有在矣

時鍾氏有某者聞之卽慨然以其土施之侯乃卜日理基爲營宮室一時材植工徒之盛若川輸雲委無不翕若中爲正殿祀天神者凡九楹高若干尺前抱廣廊旁翼兩廡殿後爲堂曰會于一東爲小廳曰有何不可又東爲小室曰幻寓西曰葛藤窩皆休息談燕之所前東總爲高門榜曰長春道院兩山之厓繚以長垣引以廣塗帶以松竹蔚然深秀其院南少西數十步有大池焉方廣數畝起亭曰清碧可臨可眺而翼乎其前者則慈祐寺僧振遠之所作也振遠龐質而習靜類有道行者而邑之名士曰羅君某尤以文辭著稱生與二人游甚

權他日又將於殿之西作新祠設陳侯之像於中爲已
與二君之像於東偏以著一時會遇之雅志不忘焉夫
鍾氏之圃池固嘗盛矣然卒淪棄爲無用之地一旦起
而棟宇之其名號之符雖若適然而陳侯營創之功要
不可泯矣昔顏魯公爲撫州刺史凡區內名山仙宇如
麻姑壇記皆爲之大書深刻於石故五六百年莫敢有
廢之者生之昔去而遠遊其所得於先達異人之餘論
宜不得而遂隱矣來者因是有聞焉則長春之教所以
演於東南而倡於興國者其在茲乎經始於癸卯三月
之九日休工於某月日董其役者曾可武張茂德而嗣
其業者則郭宗元元素也

三壇寺興復記

興國縣城西門外有佛寺曰三壇寺其地接園闈之交
據山水之會當園池之勝長廊廣殿樹幡幢鳴鐘鼓演
梵唄爲國家祝釐祈福曳履披緇聚而食者常數十百
人而金碧鉅麗煥然與山川風物相映發噫亦盛矣其
始創於李唐本名西山寶勝永泰院宋治平中始更今
名祖殿修於南宋之紹興辛卯繼修於有元之至大庚
戌寺僧有用和者嘗抽衣貲購瓦甃重覆之則後至元
之己卯也至至正戊戌始燬於兵用和不憚艱勞力營

興復既垂完矣辛丑冬燬焉斷礎荒甃歷亂蓬榛間其徒至無以自庇過者咨歎用和慨然曰我佛以一切有爲爲幻寺之成壞修否在佛宜無所與也然事佛者恆以莊嚴布施爲大因緣今我可以薦燬故而生怠慢心卽以請於陳侯侯曰是爲國祈祝之所不可以不理矧其教固能誘民爲善者乎卽捐俸爲邑民倡命邑人會某董其役而經紀之以癸卯某月日興役某月日告成爲正殿爲門廡爲僧舍爲法堂爲庖湑之所莫不以次修舉材植壯偉矩制宏麗而工役以齊餼犒以時用和於是役蓋勤勤焉余時適客是邑獲覩茲事衆咸謂是

舉也有溢於前無慊於後有足稱者而用和又數以記文爲請余以爲古今盛衰興廢亦何常之有然天下之事勤於成而沮於喪者皆是也勤勞以致成成而遂喪焉斯沮矣屢喪而不沮且能終致其成者蓋尤寡充是心也以之爲國家天下可也豈直事佛爲營建而已哉則寺之興復也宜書書之者所以表用和之勤又以著陳侯之樂善好施亦以紀承平盛觀之復之漸固如此也寺東西偏故有隙地前有放生池及廢社壇遺址常復其被侵而歸其利於寺者蓋皆用和之力云

諸史臣發凡舉例具於文牘遴選黃肅等十有一人分行各省僉以北平乃元主故都其文獻必有足徵者非精練博敏之士未易以集其事予友仲善方司膳成均實應其選戒行李且有日與仲善游者咸爲賦詩以予嘗與刊修之末俾題其篇端嗚呼傳有之國可滅史不可滅然旣亡其國矣而獨謂史爲不可廢者其故何哉蓋前王治忽之微興衰之由得失之效皆可爲後王之法戒史其可滅乎然自漢以迄近世類多羣臣奏請始克緝成典籍惟我皇帝旣承大統卽蔽自淵衷孜孜以纂修元史爲意則其神謀睿斷卓冠百王偉量深仁與天同大巍巍乎不可尚已仲善行哉採石室之遺餘詢名賢之紀錄俾信史免於缺文傳諸後世其有不望於仲善矣乎仲善行哉弔齊魯之故墟撫幽燕之陳迹呼酒長歌拔劍起舞將又不在于仲善矣乎然則仲善此行亦壯矣若予者年踰六十髮白神耗不能逐車塵馬足之間以攄寫其中情仰睇飛雲惟有慨然遐思而已然而鋪張上德以昭布四方垂諸無窮者史臣之事也庸敢備書以爲序而區區離別之懷有不服計也仲善姓呂氏章貢人有學有文其聞譽蓋翕然云

呂氏采史目錄序

皇帝既正宸極龕定幽燕薄海內外罔不臣妾慨然憫勝國之亡其史將遂湮微乃洪武元年冬十有一月命啟十三朝實錄建局刪修而詔宋濂王禕總裁其事起山林遺逸之士協恭共成之以其不仕於元而得筆削之公也明年秋七月史成自太祖迄於寧宗總一百五十九卷左丞相宣國公李善長率諸史臣上進順帝三十六年之事舊乏實錄史臣無所於考闕畧不備於是禮部尚書崔亮主事黃肅與濂等發凡舉例奏遣使者十又一人徧行天下凡涉史事者悉上送官今之北平乃元氏故都山東亦號重鎮一代典章文獻當有存者

特若有職於官者行示不敢輕也章貢呂仲善時司膳成均被是選是月癸卯卽乘驛北去八月丁卯抵北平凡詔令章疏拜罷奏請布在方策者悉輯爲一有涉於番書則令譯而成文其不係公牘若乘輿巡幸宮中隱諱時政善惡民俗歌謠以至忠孝亂賊災祥之屬或見之野史或登之碑碣或載羣儒家集莫不悉心諮訪且遣儒生危於懔等分行平灤燕南諸郡示以期日有慢令者罪及之爰自丁丑開局於故國子監至冬十又一月壬辰朔始完以帙計者八十擇高麗翠紙爲之衣昇至行中書借官印識之進於南京乙未赴山東河水方

凍大雪深二三尺仲善駕牛車遵陸而行一呼一吸冰生髯間已未至濟南其諮詢大畧如北平時又明年正月甲寅竣事成書又四十帙所搨碑文北平四百通山東一百通不在數中仍印識如前三月壬寅輦還京師已而諸使者咸集濂於是有所依據修成績史四十八卷夏六月復詣闕上進仲善以功陞太常典簿尋爲丞且以史事之重不可易視也集爲目錄四鉅編上之而藏其副於家徵濂序其首昔者司馬光旣著資治通鑑又畧舉事目年經而國緯之名曰目錄示學者以樞要也仲善今備述采史綱領明其事之良艱示後人以軌則也書之意雖不同而心之原於厚則一而已嗚呼史有關遺久矣如近代衛紹王之朝記注亡失南遷後遂不能紀載當時史臣所屬若得如仲善者豈不有勝竇祥楊雲翼之所錄哉順帝一紀卒得爲完書皆仲善之功無疑人有功而不知不智也知而不言不仁也濂待罪國史故不辭而爲之序使觀者有所徵焉進史後三月日

陳

謨 字一德號心吾
泰和人海桑集

興國縣重修孔子廟碑

洛陽賈侯思復由明恕廉勤擢知興國縣視篆旣月爲

吳元年永惟將隆化本必厚教基惟是獲上信下悅近來遠形之而動神之而宜惟聖訓爲依乃相廟學有其廢莫或舉者有其敝莫或改者有其違莫或正者大懼無以尊明祀示永久舊制櫺星門孔道抵城濠端直平豁宋元間民侵沒且百年望宮牆者窘仄由徑不良於履視前尹屢規屢沮侯力復之會部使者至民復有沮者指陳益力使者周觀大是之肆得以闕乃加甃焉夾樹仞牆雜植佳木參差蔽虧外伉總門丹碧翬騫內浚泮池芙蕖槐柳停蔭清漪見者改觀兩廡從祀棟宇震凌者易粉墨蕭瑟者與禮典舊有三程祠伯子叔子立侍傲先師位改侍坐焉舊闕文昌祠規講堂左築宮闕像設焉勒曲阜司寇像於貞石復兵毀佑文像於廡東籩筐俎豆尊罍坩爵百爾器備肄業有齋燕坐有席庖饌有舍祭器有所垣庠者崇甍壓者植甃闕者補渠壅者通自一瓦一桷罔或疏圯此一役也洵盛舉哉贊曰聖門之役羣歡輦趨材良工哲巧殫力輸巍巍煌煌素王之居泮水樂只奚斯頌諸袞裳劍履瑤琚玉藻不愆以式其風肆好八埏流虹垂光講堂孝友張仲來降文昌文翁漢代栖筠唐室邁勛旂裳興學殊蹟有美平川章甫深衣時節春秋蚤夜兢持聖訓丕融侯德不替刻

石廟庭欽於世世

興國申免倍徵序

秦漢而來田有賦賦有經豐不加益歉不加損有司守其額徵其入以爲常歲比不登明良在上或賜民田租之半或三之一史必大書之未聞倍而徵以權宜而足兵食者也自淮蔡亂二十年東南耗竭力相十而霸權相百而君更起倏謝無康歲而世無桓文之賢以匡而糾之於是有據一城以抗大國者地狹費夥則征斂百出若章貢歲取加倍之賦是豈不得已哉亦勿恤而已矣及建業兵燹其城盡徙其官屬士卒收其圖籍而其倍征之賦與額無辯正典者徵入急於星火平川常賦七千屯田雜賦不與焉當大兵之後邑里蕭條民惟正之供且稱貸弗給而又倍之雖權剝膏髓無所於出况倍與正不辯將遂爲正其爲害豈淺鮮哉縣令朱克敬具民款上於府若總制之司不得允則率吏民俯伏泣訴庭下當道者憫惻其誠與之申達且俾緩徵俟命未幾命下得可民額手相賀指子孫誓不忘於是主賦吏相率請曰吏幸乃承事今得終役得不受大府逋責我侯之惠孔厚今茲出其倍以歸簿正無窮之澤實令所致吏亦與有鄉譽焉願先生紀述示遠近永譽將來予

曰命書上考孰大於是後之人將鼓舞而頌曰倍我微者不幸作備於章貢而猶甚幸反正於朱平川誠盛美不可不書他政固勿論也嗚呼善固國者先固其民善寬民者先寬其賦充是以往無行弗達一平川邑何足淹哉余是以紀之

茅亭分韻詩序

僕與吳師魯孫觀民王伯貞對床於呂仲善館中極道離合悲歡之故運數安危之機人情物態之變夜叅半不能寐仲善曰不可以不賦請以共君一夜話爲韻韻由齒分人各成詩而詩悉同體翼日復求序之僕與觀民爲金蘭之契避亂後幸迺得茲邂逅有可感者有宜調問者有驚且愕者而又有可慶可慰者於是而傾寫底裏如霏鋸屑如卷海濤雖九韶之奏八珍之御不足喻其快也仲善好客之當時諸君俊逸之參軍僕乃牽率潦倒乎其間將弗稱乎雖然觀民將應藩府之辟其去此殆雪泥之鴻爪耳僕異日與諸君誦停雲歌伐木徒想像天末不可卽則今茲聚首歡洽何可以不識也時歲在乙巳十月

劉啟東文序

僕逆旅平川始識斗明羅先生與其朋徒劉啟東凡數

輩不多見也每讀斗明古文詩歌歎其沈蔚勁麗葩條
扶疏掩映敷不羸簡不鬱得柳柳州風骨三復不忍去
手平川先賢勲業如鍾令公爲唐名臣炳然與房杜姚
宋垂光轟烈聞其風者雖去之百世猶凜然足以棄貪
起懦而作之氣獨文章由令公來未見薰古人膏馥而
烜赫焉者豈韓子所云宰物者輕與人以富貴重與人
以文章殆是類耶夫唐之文韓子起八代之衰而柳子
亦然至於今學古者不於韓則於柳雖天縱若歐蘇不
能外厥繩檢然則勲業在房杜諸人而文章在韓柳抑
又明甚斗明固薰古人膏馥而興也嘗學宦矣已而翻
然棄去益大肆力於古向使斗明富貴如令公事業如
令公其文未必能爾爾也其朋徒經其口講指授者皆
風氣日上而啟東最稱才嗟夫由令公來見斗明由斗
明而奮者宜不少然復不多見文章誠不易得於天如
此哉啟東以其文若干篇示予敬書此而歸之夫子之
文明以縝溫以達束規矩而不輕縱此正途也昔柳子
答韋中立書自敘其學與其爲文誠天下古今準的子
熟復焉而蹈行之古人不難到也此非予言也子之師
必嘗語子矣

李梅所詩序

古稱耆壽俊者耆壽語其福俊美其德英也禮六十曰耆指使又曰八十曰耆壽而至六十八十亦云至矣然而不徒曰耆壽而必曰俊者才過千人曰俊不俊是徒福也徒福之人百歲之上者有矣可以侈國家東帛牛酒之賜而非所謂鄉先生沒而可祭於社者故耆可能也俊爲難嘗試觀三老董公遮說沛公爲義帝縞素興軍其卓識如此不俊而能之乎漢之三老爲縣掌教化今郡縣耆老率是職也吾於平川得一人焉曰梅所李先生先生踰七十精練如少年博古今窮經不倦通識政體善應事機縣大夫至者皆以老事先生皆就而問政可否緩急之宜先生每開陳忠槩切至歲甲辰之冬臺城命雄師取贛平川幾以後欵受攻先生一如師而城以安堵則其尤大且著者吾故曰耆可能也俊爲難非梅所其誰能之先生以其吟稿畀予刪集敬錄若干篇而序其端云夫先生之詩老成而慎習明達而藻麗有議論有調度予之所知耆如此昔歐公舉梅聖俞詩佳處數端聖俞不以爲然及聖俞自誦其得意者歐公亦不然也嗚呼先生之詩或非予之所深知然先生之賢則知之深矣讀其詩也因是序也可以得其人焉

謝維高升太學詩序

平川一小縣而在贛爲上腴絲麻穀粟之利行乎四方
被於上國其民亦多秀而文碩而茂蓋維昔然矣在唐
則有若鍾紹京名在旂常功著社稷在宋則有若李君
行學行純懿爲世羽儀其猶表赫顯顯者也夫平川有
如是之先正前烈故士生其間者感慕興起樂於爲善
常有以自表見於時其次亦不失爲善士予嘗應大夫
之聘一至其邑其來學之士有謝嶽維高者質醇而稟
厚內剛而外謙讀書傳通其闡奧習經義要其指歸達
於體用之學而不滯適於時用之宜而不浮可以爲善
士矣洪武十二年八月有旨州縣學生員在學年久學
通經術善爲文辭容貌端莊行無玷缺者升入太學教
而育之而平川大夫以嶽爲首選嗚呼在於鄉學卓有
令譽則夫蜚聲於壁水騰躍於天衢固其所耳雖然嶽
其勗哉抑抑乎其進之恭也恤恤乎其守之嚴也沉沉
乎其思之長也邈其志如有所不能敏於事如有所不
及使道之未充者日益充行之未果者日益果見聞日
益廣而出於尋常者萬萬交游日益多而得於名勝者
肩相接也上以副聖君賢相樂育之盛心下以慰平川
大夫士之願望而遠以紹鍾李先哲之高風芳躅也顧
不偉哉嶽旣行拜予於青原書此以贈之

書唐令公鍾紹京讀書巖圖

邱子萬命工寫唐中書令讀書巖成圖其友爲作詩且求予志之詩不云乎高山仰止景行行止平川之所仰而行之者孰如令公之賢乎巖在邑東二十里前有石截焉而中分上有飛泉百尺下垂如練小舟縈石甚險兩旁壁立不可徑水流石罅間若玉繩焉舍舟躋石磴百餘級度畧約僅容足乃至巖中寬可坐數十人面一峯奇峭如筍奇松異果交其上一石如覆舫倚其旁巖水由靈湖來有巨鯉帶銅環相傳令公所養或禱致雲雨焉嗟乎巖之景趣今古不變遊者觀者孰無高山景行之懷夫令公大賢也名臣也功在社稷名勒鼎彝唐之所以爵賞恩數極矣公之所以遺後人遠矣雖在睿宗時不爲薛稷所知在元宗時不爲姚崇所喜或由工部尚書刺史彭州或由太子詹事刺史果州瑕瑜不相掩益足爲白玉之美而崇高之難處賢者之責備亦不容辭矣嗟乎今人其難哉觀是圖者思其所學思其所立而思其所蔽斯可也矣因子萬初度日出此故志此使藏之

答祿與權

字道夫洛陽人國史院編修

恭題御賜繭紙書呂太常父母銘碣後

君之賜臣所以旃能也明主愛一嘖一笑所賜必臣之
有功豈濫及哉我皇上順天應人當卽位改元之初遂
命儒臣編摩元史而元事多所缺畧明年己酉乃遣國
子典膳呂君仲善訪元之故都以采錄之兼以帑藏之
理仲善旣受命不宿於家趨裝就道馳驛而行抵北平
歷山東旁搜遍撫細大不遺而勝國一代之實錄乃得
其全類次成帙滿載車乘又明年庚戌春三月使還并
所覈儲蓄虛實之狀概以實呈上深喜之慰嘉益至勞
以白金仲善稽首力辭更以高麗所貢繭紙賜之長七
丈餘高尺四許堅厚滑澤光瑩如雪此異域之產而中
國之所寶也匪仲善之服勤王事何可得之百朋千鎰
無以踰此仲善受賜遂以昭二親之潛德而徵銘於翰
林學士宋公濂徵書於工部主事杜君環文墨輝煌相
映仲善其知所重哉夫皇帝之不輕用而以賞有功仲
善之不輕用而以揚二親是可見其君臣一心明良相
逢國家之亨泰有以也是年夏六月史成仲善以功進
太常簿尋加太常丞易曰錫馬蕃庶晝日三接仲善爲
近之予因其屬言以識其上僭敢附此題云

呂

復字仲善邑人太常卿諡文恭

知止軒記

客有問予曰足安在手指足趾之義何以殊又問飲酒之器曰爵官爵亦曰爵其義何居予謝不知客請教乃盱衡而告之曰按字書十趾爲足人之生也其四肢百骸賦形至此而止是故云足趾從止與手指揮之義殊焉爵之鳴曰節足言人飲食當知節知足則自不至於醉故名其器示戒也人之仕僮爵食祿者亦當知止足之分與飲酒之不繼於醉之義同故亦曰爵達者知之故有辭千乘萬鐘而甘於貧賤若漢之二疏者因自謂曰知足不辱知止不殆也客謝而退予自丙午大臣薦至京師受官之後中間屢仆屢起使節奔忙往來北平

山東山西河南關陝湖湘江浙諸省兩淮蘇松常鎮徐揚徽滁太平諸郡或采史徵賢化俗觀風理學校察官吏憇新附招叛亡代祀中都大厲使謁皇陵之類雖官居僅二十載而在朝之日十無三四不敢以家累隨勞心焦思櫛風沐雨間關險阻因感得疾使復冒遊衆人中其辱與殆何如也乃憮然曰予嘗以知止教人顧乃不自省耶君命之嚴不得辭耳由是懇章乞休庚申夏始得許南還構軒陽坡之麓杜門著書以迪子姓雖未敢望二疏之後塵其於知止足之道或無幾也因題其軒曰知止并以前所告於客之言爲記書於座右

胡

儼

字若思南昌人國子監祭酒頤菴集

尊經閣記

韻之興國縣重建尊經閣教諭鄭永義爲書來告曰王明厚者縣之藍田西人也嘗爲學諸生今居田里慨念其志之不就而獲教育於學宮者有年縣欲報之心無以致其力乃捐已貲卽禮殿之後講堂之前因舊址重建尊經閣三間閣之左右又爲屋二間以輔翼之高廣稱焉加之雕斲飾以藻繪下俯清溪前列遠岫巋然聳一邑之壯觀匠石之工以日計者七百有餘興作於宣德壬子冬十月落成於甲寅春三月願公記之以表斯人之志以風勵世俗垂光於無窮夫經者常行之典所以載道也堯舜禹湯文武周公孔子之發言大訓存焉曰易詩書禮樂五經之見於白虎通者曰易詩書禮春秋此五經之見於藝文者也其見於經解者曰詩書樂易禮春秋爲六經曰七經者於易詩書春秋而益以三禮曰九經者於七經而益以孝經論語至於十三經則又於七經而加以六緯也夫經之名與數雖不一所以載道則一也君子窮理以達道力學以致知必以讀書爲本讀書者於經史子集以及乎百家之言無不討論而覽觀焉亦以經爲之本閣之藏書以待學者經史子

集百家之書無不在也而必曰尊經者所以示崇重而使學者知務本焉此永義之用心誠有望於諸君子而斯閣之建豈獨爲溪山之觀美也哉且明厚志不忘乎舊學惟斯閣之是崇其與世之徼福於異端者可同年而語哉故爲之記

廖

莊字安止吉水人刑部右侍郎諡恭敏

重修廟學記

興國縣儒學在城北門外去縣治里許歷歲久不無傾圮相地者謂學路宜東出景泰四年訓導陳鶚具申修理改路時都察院右僉都御史韓公雍奉敕巡撫江右

以興國縣官缺員委鶚署掌縣事乃與教諭黃哲訓導陸璣協謀設法加禮勸助而鄉先生胡鳳暨夫義民邑士咸樂助焉以戟門逼近大成殿兩廡局於行禮乃展地丈餘增兩廡二間爲七間重建戟門七間東爲土地祠西爲三程祠櫺星門在戟門之南舊用木易朽改用石焉葺三程舊祠以貯祭器在尊經閣東重作會饌堂五間鼎新號房十間於修業齋後進德修業二齋在尊經閣之前則加修葺復作一小軒於修業齋後以爲退休之所圖七十二賢併儒像塑三程像以起瞻敬路多民地及韓公臨邑命官給價而取之創始景泰四年冬

十一月落成次年冬十月於是行禮不局於舊而安神
肄業貯器會饌退休各有其所櫺星門尤煥然壯一邑
之觀路不西而東矣旣而黃君哲介諸生求記於予惟
我太祖高皇帝稽古立學以明人倫以育人才列聖蓋
相承矣今天子於邈城軍衛增置學校蓋欲學者敦本
以務實明體以適用也今茲縣學之修諸生聚處講學
於斯上體朝廷建學之意下體都憲韓公及諸君修葺
之心窮經以致用於致君澤民顯親揚名仗義守節
卓然流芳簡冊顧不偉歟若曰是學之修足爲一邑觀
瞻非予所知也叻修官民姓名勒於碑陰云

劉定之

字王靜永新人禮部右侍郎諡文安

開州守李君致政序

朱文公小學所載李君行先生止其子弟不令冒京籍
應舉者其篤於德行不苟富貴可見也去今數百年而
其裔胄猶居當時故郡卽今贛之興國蕃衍不衰替且
有仕至州太守者太守字循道工楷書書奏牘終日數
千言端勁無舛訛試其藝文於天官之堂取前列釋褐
遽擁旛蓋縮章綬得千里民社而蒞之開州古之澶淵
吾嘗涉其境水陸衝要民稍困於賦役循道勸耕稼歲
儉輒發廩賑之新齎舍展拓令廣遠雖甚費無吝亦助

以已俸婚嫁失時勒其勿論財而廢禮遵令成室家者
 三百餘輩政成俗樂逃徙來歸闔境增戶載版圖新里
 五十餘嘗旱蝗禱而災弭民謂非循道殆不克感神凡
 循道學與政可稱若茲予得於刑部侍郎廖公安止翰
 林修譔劉公仲方之言侍郎未第時常授徒與國修譔
 澶淵人也循道官滿澶淵年猶未至致其事以歸侍郎
 止之循道曰今民牧亦未易為利吾民而已將何以迎
 合時好惟彌逢以身干進豈不斂怨於下亦非平昔守
 己之素心也歸則溪山之間惟我所如其孰牽制哉於
 是侍郎送循道歸徵予文予因有唱焉聖天子視海內

元元如赤子彼貪殘不能撫綏至勞斧鉞草薶禽獮之
 闕於宸衷矣安得循良徧付以黔黎而乃令若循道者
 乘間引去何堂廟司陶鑄者獨畀人取急流勇退之美
 譽也將崆峒章貢風月佳致深足戀戀他處不能及是
 以循道歸莫過乎予郡僅隔青嶂何時予歸尚往訪焉

鍾

字尚賓邑人國子
監學正游菴集

重修譙樓記

與國舊澱江鎮也宋太平興國七年割為縣因名焉慶
 歷甲申大中大夫程公珣以大理丞來知縣事視解宇
 譙樓卑陋修做補廢而改作之歲久傾毀紹興十有三

年殿中丞韓暉蒞邑重加修葺我國朝洪武戊申縣令
 賈思復因新之至壬子馮承事欽增修正統改元莆田
 陳璉出宰一新解字惟譙樓未備更漏不聞景泰癸酉
 八桂熊公鑑奉朝命來宰顧瞻歎曰譙樓何以萎壞若
 是輒以興復為己任乃乙亥冬謀諸僚佐捐俸以率先
 勸富民以給工需儻民力蠲浮役以為助下甃磚石上
 柱棟楹落成是歲子月甲戌耆老某某等合辭請曰是
 役也事集而民不擾侯之賜可忘乎願述以記之仰惟
 聖朝之制自京畿以至驛傳衙門建置雖有大小譙樓
 之設均備蓋使民知禁候一政令也况郡邑承流宣化
 所係猶重否則官僚無以警夙興夜寐之思民庶無以
 興作息經營之志熊侯斯舉豈不宜哉侯於此尚其夙
 夜祗勤子養黎元使斯邑之民飲德蒙惠如古之密邑
 中牟以著稱可矣遂書以為記

章廷圭

字文瑞石埭人興國知縣遷贛州同知

重修江東廟記

成化壬辰十月癸未予奉命尹茲邑視篆越三日例謁
 境土神邑南西百步許有江東王廟建自元至正迄今
 垂二百年傾圯甚矣竊以朝廷設官以敬神恤民為職
 神弗敬民將焉恤今廟貌頽弛風雨不蔽神雖在天吾

有司何職耶汝衆獨無同我心者時王叔璉氏唯唯無
 吝色捐重貲以倡諸首聞風而樂助者以次而集乃命
 道士蕭玉韶職厥事老人胡克讓董厥工興於癸巳八
 月己未迄於甲午三月庚寅落成前後宮殿一新周匝
 結以磚石計其費總白金七鎰有奇禱宇既新裝飾丹
 牖有羅彥淵甃砌堂陛有陽仲昱陳綱維獨增其步廊
 胡克珣陽仲暉又架其海頂木石良固丹青輝映殆非
 前造者比工畢咸請記予惟王之出處感應之迹翰林
 學士宋公濂記之詳矣毋容贅其於人之所以敬神神
 之所以福人此感彼應一自然之理也易曰寂然不動

然而遂通矧王迹於斯廟於斯環宇內皆被其福豈無
 福於斯乎吾民無惑焉因書樂助姓名於後方以為後
 之為善者勸抑亦後之稽古者於興廢之故有所徵焉

劉

鴻字雲表泰和舉人七星集

培春亭記

宏治己酉心古呂君治榴岡之第已而顧西址隙地徑
 畝謂其仲小山曰亭之可乎小山曰可敞其前為亭表
 以壯之何如心古曰俞子其濟吾勝矣壬戌之冬乃命
 工購而屋之材良工堅雄渾精麗旋螺覆巔交錯藻繪
 埴埴如也瞳瞳如也室而輔之撫而軒之奧如也翼如

也既又因山之麓伐石爲臺臺爲之磴百卉蒔焉去臺而西嘉植灌樹當夫春日載陽芳意益塞天工所至神奇畢呈積李縞夜崇桃炫晝風露披灑芬馨襲人疊錦層章殷殷織織林樾周遍流陰蔽芾盛暑之日清風滿床萸菊占候芳蓀抱寒亭中之春貫四時而無間也今年春予訪舊平川君昆季觴予其間者旬日且曰亭矣不可以無名敢請予爲之題曰培春署其表曰西墩佳麗則又曰名矣不可以無文文以屬予夫培之言養也春四時之首天地之元功也亭中之卉苟欲生之非培不可在吾人有輔相之道焉是故封土以固之植槎以植之汲泉以灌之劬然如保嬰兒氣至而滋息焉斯勃勃矣彼夫養人利物之道有異此哉心古君隱約不仕未發舒其培春之用而託此以寄之然其所以康濟於身家流衍於來裔者初不待求之外也培之身心融聲和積而晬面益背皆春也培之家孝友肅雝充而睦婣任恤皆春也培之子若孫善積而慶鍾所謂庭階玉樹蘭茁其芽皆春也昔董召南讀書行誼於終南之下孝友所致生祥萬瑞庶幾乎培春者昌黎韓子重之以聲歌千載而下謂董生爲何如人今君兄弟如其行焉惜不得如昌黎大書特書傳之無斁而獨委之予也予之

文異時傳不傳未可知其所謂培春者足傳無疑遂不辭記之以告其後人俾嗣而培之毋替

擊壤會記

國家覆冒海宇垂百餘年風噓日薰人物熙熙在處皆然興國贛屬邑也山盤谷稠風氣完固食土之毛民樂其生而多壽考迺宏治壬子時平歲登公私衍衍有垂白之老二十二人含和履祥蹈舞皇風相與謀及時爲樂以詠歌堯仁以終餘年於是月爲二會會以朔望鱗次而周戶而不醲是歲九月甲子舉事牲肥酒香籩豆有楚乃其初筵諸老深衣大冠魚貫而進前設几格俯伏其下北面稽首焚香籲天曰願明天子萬歲宰執爲隣藩臬爲良郡有賢守邑有賢大夫用康保我民亦云休哉願雨暘時若百穀滋植公私羨餘間閭笑語野無橫民隣有善俗俾我老人永有今日之娛亦云休哉已乃舉盞更壽揖讓就坐以齒爲倫坐定諸少年班立而揖有引卮酒跪而進之者曰孺子不敏幸茲良會躬侍杖屨先生長者詎無有以教我乎諸老人推其年高者詔之曰若知今日之樂耶高皇帝列聖今天子之賜也語有之臣民之福皇錫之極汝則保極逆極者殃保極者昌吾輩老矣得爲保極之民汝則念旃景德懷刑毋

濱於家毋梗於鄉毋突冒於有司毋貽罹我父兄汝則念旃後之視汝者猶之今也衆皆唯唯酒五七行諸老人起而酬酢有誦淇澳以相規者有歌陶風以相樂者有詠歎考槃之遺音者而未嘗不歸德於上也遂名其會曰擊壤壤不必擊而擊壤之樂同也少酣有倡之者顧執事曰不有所作曷伸本懷人賦近體詩二首平淡古雅有太平之音章成懽甚且酌且哦日冉冉下迴薄桑榆間乃反爵相揖降階少年奉諸老扶醉而出其爲會無窮而樂無窮也會有圖圖諸老人像所賦詩分隸其下竝板鐫以傳君子曰王者之民皞皞如也康衢之謠帝力何有今茲諸老一則曰吾君再則曰吾君何者太古之餘其風朴盛明之世其文昭矧諸老生茲周程過化之邦又多詩禮之族嘗學問而知禮義者其所以撫景和鳴一攄其忠愛之素而動作語言皆有足觀者豈偶然之故哉廬陵劉鴻弁錄而爲之記

名宦祠記

宏治乙丑冬同安會侯選來知興國下車至土地祠見旁寓木主題曰縣尹達侯之神諭於吏民僉曰達侯麗水人成化末令於此勤敏公廉盛有威望政惠及民不可枚舉聞警修城不費公帑不瘁民力致期鳩工民用

安堵明年卒於官數著靈響署邑者感而位其神於斯
會侯曰公爲邑長生有民功死當廟食何至以鬼道視
之哉因問昔令如達者幾人對曰國朝則章侯廷圭唐
侯子儀有宋則何侯時莊侯夏程侯珣章百隸人成化
中知縣事興學養士斥奸化頑能以廉恥風民疏決水
利保障靖安進秩少府去衡來虔茲其故治時有兇渠
李福正者以其黨據南村洞剽殺人出沒汀邵間悍
不可撫相機擒之四封晏然唐徽人平恕安簡學道愛
人而文足以文之何臨川人爲政先風教而後刑威嘗
作安湖書院祠周程子衣錦山中樹之風教以孚化頑

獷莊溫陵人以淳熙進士爲邑主簿以數和嚴
反坐以弭訐進秩縣令民有去思逮大中程公實爲二
程先生之父以儒飭吏推誠待民德風惠化囹圄幾空
所知者如此莊故有生祠祠廢有碑程以儒先得祠學
宮而安湖之祠亦廢餘皆眷眷於民心而未發者侯曰
嘻予合祠之矣於是卽儀門之西爲賢令祠首正大中
之位次莊次何次唐次章而達侯殿焉精神所集儼其
有臨邑民甘棠去思之意至是大慰而會侯光明正大
之政亦於是乎成焉題曰賢令祠祭而妥之間記於予
惟昔伯有死而爲厲子產爲政并子孔祠之五公人物

何啻子孔抑侯之意固有出於子產之外者矣前政諸公所以敷被於民者可考也此邦之人聞而見者豈曰忘之率其政是亦諸公之政率其化是亦諸公之化然則宜乎其有是祠也祠無窮思亦無窮思無窮則而服之者宜亦無窮於乎祠之託於興國者豈小補云

黃

泗 福清人興國知縣

興國舉廢事記

興國縣出贛水百餘里僻邑也正德庚午陷於賊恣所焚蕩予來為令在六年之後縣之規卑弗稱焉學之制陋弗備焉民間之童子無社以居業焉無告者無所棲焉司郡之過是者行館不崇焉城垣多傾舖舍不修較場不治隘守不立陰陽醫學稅課無局申明旌善無亭祀典之所有者無廟與壇蓋事之所不可廢者多廢矣孔子曰蠹則飭也是可以已乎乃相時之宜察義之急而漸次舉焉邑城當予之來崩四十餘丈屢以寇聞民懲前變又見城郭敗壞悉欲棄家遁予召若父老反復諭之具曰唯命乃募壯為兵四面固守選義民之能治事者視民所有磚石悉借之約以後還勸富者給其工食日夜築之練兵之餘躬臨督率不十日告完又沿城置窩鋪二十四座以處守兵風雨早夜無所苦使賊

不能乘民賴以無恐父老喜詣庭下謝且請曰城舊五門往因備寇塞其一堪輿家以爲不利願公復焉予曰昔邾子遷國或曰利民而不利君邾君不卹也况官民兩利乎卽白兵備楊公啟之乃建城樓一座與諸城等諸城樓歲久多敝亟請於巡撫王公兵備楊公郡守邢公皆復之如其舊戊寅春夏淫雨城崩九十餘丈又申諸當道修之二月而成興國之城得以完且固者其出予所補蓋三五焉邑學舊有聖殿殿後有明倫堂皆陋而欲敝予來數日丁祭值風雨行禮汗泥中亟謀修理乃訪嘗與鄉飲諸耆老及義民之德力相稱者得鍾昭錦等一十八人爲書請之長至祝拜萬壽禮畢設宴於公堂隆以禮貌詢以民情而退次日諸耆老詣謝以修學語之有難色喻以義理俱忻然諾乃召至堂量其家厚薄定其工之輕重各令認造之而約其成期曰大成殿曰明倫堂則昔有而今飾之也殿中之聖賢各有龕位殿之前爲丹陛丹墀東西爲兩廡外爲大成門門外爲泮池池上有橋橋外爲石櫺門門之前爲石屏最後爲集鳳坊左爲學門學門之左右當兩街口爲敦化善俗二坊堂之下爲東西二齋齋各有號舍六間周垣數十丈粉繪加焉則昔無而今創也總費若干金而吾一無

與特以義官呂律老人呂資瑤往來督嚴爾其聖賢牌位師生廨宇祭器物用之缺壞者則予所整飾也贍用田塘數畝混入豪家則予所按志追復也民間子弟之俊者王誦等若干人則予所延師啟教進補儒學生缺者也憲伯靜軒陳先生爲記其事加詳焉又毀齊天聖母七姑娘天符等祠之淫者爲社學於城之四隅擇社師令童子各以其方人無失養焉毀寶積志道寺觀之淫者爲書院於縣治之後中祀三程旁爲兩齋蓋大中大夫之宰於是二先生實從之故祀之以示景仰之意而爲齋以待邑之有志者闢邪而崇正抑佛以尊儒興

國之人於是多知學之爲貴矣縣治者臨民之地也堂不高何以示尊卑乃仍其舊而改觀之道不辟何以辨等級乃砌甬道於其中而分砌小階於其左右縣佐無廨乃爲簿幕堂室於正宅之東西而垣牆周焉堂之西爲石庫以貯財帛甬道之東西爲六房以待諸吏復爲舍二十間於簿廨之前儀門之東爲土地堂其旁爲廣儲廳翼以倉屋若干儀門之西爲賢令祠其旁爲審刑廳翼以獄房若干儀門之前舊有譙樓譙樓之外東西列陰陽學惠民局申明旌善二亭蓋至是而後縣之規模稱過者起敬憚焉嶺北有分司分司前爲持敬館東當

街口爲澄清坊以表之府有分館分館前爲牧愛亭西
當街口爲振育坊以表之而後上之至是者不嫌於褻
也養濟有院而後無告者得所風雨且暮無所哀也較
場治於北郊上爲演武亭中爲將臺表以石坊繚以周
垣而後練兵有地也縣前馬岡雲溪有舖司兵稱便而
往來得假息也衣錦迴龍巡檢有司龍子龍沙劉坑油
桐衣錦梅窖南村花橋豪坑迴龍温陂槎園企嶺坳方
石楊梅逕荷柱陂墟下垓頭峽田有隘而異服異言者
有譏也稅課有局而抑末之意明也江東東嶽有廟而
名山大川之在其境者土穀之神邑之厲與有功於民
者咸得祀也鄉之賢宦有坊牌曰桂林曰賢路士夫君
子有所勸也蓋月再有期而諸廢畢舉焉嗚呼上之所
爲常患民之多違今吾之舉廢也其大者多出民所自
造而吾不知其成其小者則贖刑之金所措出之民付
之督工吾必計數察其弊而不與其出內蓋事之成雖
若甚速而吾無訾於民民無怨於吾豈非興國有義民
使吾得免爲庸令哉故特揭其蹟於石并各勒其人之
名氏於以告後之執政者如欲舉吾之廢慎毋曰民不
可勸以義也且以示其後民使知先民之向義如此有
司者如有勸焉不可後也

羅洪先

字達夫吉水人左春坊左贊善諡文恭念菴集

安湖書院記

禮爲學者動必釋奠於先師而後行事其有國故則釋奠無合也所謂國故謂其國之昔人可以爲師有是人不必遠取合祀矣古者仕不去國幼學壯行其政與教之所由來固國人聞見之所及也取其聞見者而爲之師在上者不特備物釋奠爾矣自邑宰下士以至方伯連率之尊其鄉射飲酒養老勞農獻馘訊囚之政必於學焉意曰此昔人政之所出吾得無有怠棄乎在下者不特奔走執事爾矣自校人進等以至俊選學士之賢其絃誦詩書干戈羽籥德事曲藝之教必於學焉意曰此昔人教之所出吾得無有汚壞乎本其所性而導之入率其所知而程其功不强以難能古之聖人化易行而久不廢用此道矣宋咸淳壬午何令時以前令程大中識濂溪於南安司理遣二程師事之而聖人之學自是復明於世是三程者興國之國故也於是爲書院安湖祠祀之而侑以濂溪其廢與興往莫可考正德己卯黃令泗慮安湖地遠改建邑東前爲堂以稱祀事其後復以陽明王公弭寇之功多在諸邑而其學固周程之遺也則別祀於尊經閣下然其物典不備久且就弛嘉

靖丙午冬林郡推萬潮攝邑事因教官徐昇與諸生之議得請於巡撫傅公鳳翔叅議方公任張公永明副使高公世彥督學蔡公克廉咸樂其成林復躬計之於是發帑飭材以儉爲功汎掃牲帛令載徭賦畫爲條式憲諸來者春秋之吉諸生告期令率屬牽牲於門奠於堂由北階經修省堂入奠尊經閣下接而行事其禮如堂閣左右名宦鄉賢兩祠以次徧舉畢事乃退非釋奠入謁諸生聚講修省堂誓對所疑議不及政朔望入謁亦如之其非入謁校官以五日卽祠前主靜定性持敬致知四齋考業諸生祠二齋齋各四舍凡十有六舍諸生

餘三十人必其俊迺得選斥其不率與暴慢者率闕之令以上事事復得請盡列諸碑迺遣諸生王世昌呂雲來徵文惟昔之創始今之舉廢皆與禮之國故甚應而導率勸戒視昔益密可謂有志於古之政教者興國之風將駸駸日可進於化矣雖然濂溪以無欲而學聖二程自述所受謂天理實由於體貼而後得之陽明處困之後慨然犯羣疑而爲良知之說蓋亦有見於吾心是非之昭昭者未始有欲嗚呼是數先生所以出其政與教者孰不各有所自得而其所以能自得者非知聖人之所以聖而極力以求其至乎知聖人之所以爲聖然

後知世俗政教之所以敝而不敢安於怠棄極力以求其至然後推本於己者無所污壞而未嘗假借剽飾於其事為故著之見聞自能信於其國之人也今比先生於國故且師之矣將極力而求其所謂無欲以至之者亦有不容已乎將惟免於物典之急棄污壞而已乎其位近其居不求斯人之所以出其政與教者而或假借剽飾於傳記簿書之間縱選舉而專用之寧不為長老婦孺與臺商販之所訾歎嗚呼為有司與諸生者其無徒以遵豆事先生而自安於世俗之習哉洪先寡昧竊嘗以無欲為學而愧未有所至既與林知厚逆其志之必有成又幸興國之重有遭也因為記而僭論焉

鄒守益

字謙之安福人翰林侍讀學士諡文莊

興國縣志序

興國尹盧子宁以公事至安成相與切磋學道愛人之義曰是義也古之人行之矣上愛其下故明德之義若保赤子下愛其上故樂只之化民父母之自天子公卿以至於藩臬守令壹是皆以父母斯民為王道盧子瞿然傾蓋若舊也踰年盧子新修其邑之志遣羅生誼鍾生宣性徵言於首簡發而讀之則識沿革述利瘼提綱掇目蓋八萬餘言首地理次創設次食貨次典禮次學

校次軍政次官師次選舉次人物次列女次藝文次外紀次寺觀凡十有三卷泰和曾友于乾所纂輯而盧子躬訂讐之稽舊訂愆哀然可微矣時方聚講東山之文塔顧語諸生曰茲其學道之微乎父母之愛子而經營家政無所不用其極也考其區畫起其廢陋節其出納慎其軌物時其教迪簡其俊乂砥其行誼消其奸宄備其典章猶以爲未也疇分櫛編而登諸籍俾有所憑稽以世其業邑之有志也其家之有籍乎縱佚以玩歲則視籍之紛而莫之理違道以干譽則飾其籍而喪厥實拂百姓以從欲則惡籍之害已而并去之茲三蠹者皆

坐無赤子之愛耳充真誠惻怛之愛而超然於三蠹其庶有古之義已乎興國在贛爲巖邑然名宦之遺愛鄉哲之典型舉班班可述至於開聖學之脈闡忠義之矩自足以爲來世法程大中以循良爲令識元公於理掾至遣明道伊川師事之而陽明先生以駿功奧學同俎豆於安湖他邑莫與京焉文信國以艱危開督府空坑之厄神實相之而鞏公信統制之石鄒公瀨衣錦之寨立懦起衰猶足以衛宗社而警羣衆後有作者稽古而思齊焉則道遊程門世濟鯁直可以爲李君行協義幕府溫詔褒嘉可以爲鍾紹安詆訐反坐積案立決可以

爲莊正禮擇師選教險阨丕變可以爲何了翁疏渠勸
農蜂屯殄蹤可以爲章文瑞景龍密斷克清凶孽可以
爲鍾太傅容管靖寇勲名終始可以爲謝征蠻獨餞東
萊築圃雲堦可以爲李和卿則是志之輯纂訂讐將爲
興國世守之良籍尚永其愛於後政

盧

宁

字忠獻南海人
進士興國知縣

朱華塔記

皇帝御荆瑞以布河圖奠燕元而正方夏雖以德禮爲
尊亦以山河爲壯凡若藩服司邑罔不測日相攸帶水
環礪無致敗缺乃崇都居其內有融結外少疎抗可

辟可培太史卜亨以符址錄興國唐先無縣而形勢可
宅兩都壯其祖龍五嶺隄其汎駛經以濊川抱以激水
江洄流平遂繁鉅鎮其東北桀梁西南伏瀉師楊筠松
瞻之大順間土人曾文迪請於西山橫石豎塔補缺障
空大光官曜乃易世裂贖於宋陞鎮而邑時則民物阜
康科第膺仕官能吏治服案令終元閨塔夷於橫石明
興塔廢於西山激水爲錮江流不平俗尚悍訐士好逸
遊民逃業荒沙圖弁里迄於今日氣習益漓文命不振
都無完里者十三里無完甲者十九不錄鄉書者十餘
舉不登科甲者四十餘舉居民囂訟而貧亡領宦淹滯

而訕去猥予庸鄙令尹是邑職兼教養實厲心力端表樹聲釐奸勅法如是者三年步畝清籍問俗課農如是者三年正誼庸禮課題修祠如是者三年而效未舉士民咸歸咎西南之方塔圯水傾文峯弗卓於楊曾故智有遺思焉予懼夫訕道而伸術遠人而聽神將啟天下之棄周孔而宗郭璞者特重難之曰是予治教無狀也是予心力未竭也於地靈則何尤且福利未見靡財勞民人謂我何未幾而儒茂耆年里正各以狀進起末有條福咎顯切許之不可禁之不能稍動以義則富民曰鍾世清經始圖終基崇功倍曰鍾常濟歐陽天相王如澄蕭鳴聲王有權王以魁郭景乾不待強勉繼勳程能曰鍾世召王珂鍾求運謝表鍾岳謝景維鍾成業雷己効順分勞固盟謀同筮協乃歲庚戌午月庚寅拂曙向辰吉蠲刀牡告土於橫石之坵居申乘寅出乾入巽星親尊帝宮旺運龍是用開基以昭明德獻文檟於沃崖發瑤塊於寶冶纍石銷金督繩削墨層七面八外直中通高像陽儀方倣坤少徑勒鋼條頂穹圓鑄膚環佛相景戶廊翼飛懷風鈴下承以梵宇側周以露臺曲房縈而窈眇丹梯截以峻嶒拔狎霄之玉幹浮天花於太清入問名於主人主人報以朱華曰天分九野西南爲朱

近太華之居方儼蓮峯之十丈也既相與登高而觀望
履武而徘徊則見美名既出朱華增色上叅鶉火旁綴
須女反景細柳曜靈扶桑鴻昊垂炎極垣流紫七魁旋
標五老現昂卿雲薄護絳煙微籠盛銅雀之麗粧伸金
莖之露掌日月運而停輪星辰夜以棲駕影搖中女之
上宮光射丹穴之輝煌也可謂文明之祥矣迺睠四顧
則青龍俯項於錦野元龜匿首於藍田白虎蹲踞於參
舍紅鸞翔奮於箕躔庶幾乎金甌玉盃以正罔缺也是
不可儲和平富壽之福與魁名相業之才乎乃進士民
而告之曰若知地靈而人傑矣若知地利之不如人為
乎是故禮義廉恥四維不潰為身之華倉庾圓圖制節
不濫為家之華文章政業材美備足為國之華而蒞官
於是者完名節以躋華要可知也且夫朱華者興國之
西南也虔州則洪都之朱華也洪都又京師之朱華也
郡縣繁昌則藩甸無虞藩甸茂實則根本安固是一朱
華也不以小而重不以大而偏後之君子與衆愛護因
時修葺俾勿廢墜豈非斯世斯民無疆之休也哉

會于拱泰和人副都御史

盧侯生祠碑記

嘗讀循良傳見若守令著民庸者郡縣每神事而尸祝

之豐碑茂勒永存去思是故勿翦甘棠之遺意不可謂
非古也興國素稱巖邑俗悍獷弊積虛糧千六百石歲
苦催輸嘉靖丁未盧侯被命下車日夕勞悴憫切焚溺
於是集衆慮乞上裁履畝清籍量儘虛糧正等則以便
徵派存荒田以待復業復餘田以舒民力定經界以正
田糧定冊式以便造解覈屯田以杜影佔或議均平或
議建立興革宜民罔不殫智嚴保伍法以攝豪頑改朱
華塔以挽文運先是舊志散逸侯特除館購求舊遺禮
延予兄乾纂輯相與校讐至夜分不倦必得幽隱可信
可傳侯今入爲南部郎去興閱四載方自興擢守潼川
時興之士民耆老追送虔驛羅拜泣下戀戀若失慈怙
不忍捨去歸而協謀捐貲建生祠於縣治右凡若干楹
中肖侯像將伏臘駿奔朝夕瞻仰恍若侯常臨之在上
暨郡倅許侯北門來興攝篆鼎新祠坊以景賢範迄今
林侯一愚至登祠仰企歎曰絕盛難繼與治同道事求
纘服祠宜用情粉飾丹雘勿容褻瀆邑簿張三山曰侯
之澤興也亦旣深矣民之思侯也亦旣切矣弗碑以記
久而或湮可乎爰屬予兄冕以書徵予記予適督備重
夔侯雖自潼入部矣然知侯且稔竊惟天理之在人心
不可得而漸滅故侯之澤日以深民之思日以切與夫

林侯之所以用情皆出於天理之至公至正無上下後先久近一而已矣志侯之績者雖古循良著民庸亦若是爾昔宋程大中識周元公於理掾遂遣二子受學實以開興之教化嗣若莊正禮章文瑞輩皆興民間見所逮卽是推之則先侯有作者孰俾之不沒於今乎益可見夫人心天理之存而未泯久而彌光也已侯名字忠獻號冠岩廣東南海人嘉靖甲辰進士

葉向高

字台山福清人
大學士諡文忠

重建名賢祠記

興國故有安湖書院祀宋周濂溪程大中明道伊川及明王文成大中嘗令是邑故祀其祀濂溪者判虔州也文成開府於贛以講學顯故得並祀歲久書院圯廢移主他署中邑令四明何君初下車瞻拜喟然歎曰名賢俎豆而怠廢若是其何以勸士且茲邑非文信國血戰區乎胡獨靳也乃議卽書院故址爲祠捐俸及贖錢爲經費資奏記當道咸報可諏日興工以典史趙獅督焉祠畫爲三中祀濂溪大中配以二程左信國而右文成以邑人趙鞏配信國從起兵而死王事者也祠旁翼以兩廡貯祭器及居洒掃之人又爲房舍若干待諸生之講業者匾其門曰名賢祠示仰止也工旣竣士民走祠

下肅拜咨嗟君又書太極圖說定性書及正氣歌與文成所闢發學庸首章於壁令學者得朝夕省覽以作其向往之思蓋君之所以昭往迪來意甚勤矣於是學博蔡君體仁輩咸謂君是舉有關風化不可無記而邑丞薛雲綬與予親又世兄弟也走書白門告予予惟世風之得失觀所尚可知已自洪永以至成宏士習醇茂上之人標軌示趨非濂洛關閩不尊非忠孝節義不談稍變而嘉隆間則西方聖人浸淫膾炙而濂洛諸君子誦矣又變而至今日則縉紳先生之卓詭者明目張膽推彼教於六籍之上卽洙泗之講席若不足以當靈山祇

園之下乘向微國家令甲列聖敦隆將恐先聖宮牆過者不睨矣而况於濂洛文山以至姚江哉何君作令未幾獨能加意於此數君子經營俎豆惟恐不虔其標創如此興之人士當必景仰前修以無負賢長吏師帥至意近之爲文成遠之爲文山又遠之爲周程要於闕然有以自修而不爲高談渺論以欺世則何君之功於後學多矣何君始以名孝廉振鐸天台士服其教有馴鶴之異其在興摘弊寬賦感鬼夜號而雪冤狀種種多奇政治未及朞而士民大孚嘗恐以才能徙去其賢有足徵者他日邦人奉君當不在大中下矣予素不習君緣

薛丞得聞君事喜其知所嘉尚足挽頽俗故書此以復
俾勒之石役經始於己亥年七月初六日成於本年八
月朔日爲費若干金君名應彪字闇然號禹籓淞之慈
谿人

何應彪

字闇然慈谿人興國
知縣遷滄州知州

文昌閣碑記

夫地列四維獨異位有闕文運氣雄三合隘水口足鎖
靈源翳自肇邑以來垂八百禩凡此提封之內越數千
家而鄉書猶讓蟬聯賢關幾於嚙吻者非直人傑之難
逢抑亦地靈之未相耳萬峯舉業而景曜不躔一溪沿

洄而玉龍無顧自匪神力曷挽天工於是形家選勝於
冰東日者卜期於元朔辟地數十武載咏斯千建屋十
餘楹眷言肯構堂顏積厚旨在培風閣祀文昌兆祈貫
斗蘭橈桂棟居人競輸金錯之刀繡柱綺疎過客欲題
銀鈎之筆水光凝而翠微耀山郭近而紫炁鍾畫閣連
雲憑軒舒嘯則有塔影前摩碧漢城隅印點滄江激濺
合流於平川倒笏揖朝於橫石松壩匯爲屏辰水曲障
爲咽喉形勝巨觀澄峙畢映龍華獨聳乎陽山獅象互
呈於靈岫上洛書石墨之異覆笥貯玉牒之編龍分寶
石龜疊東龕鄉齒儒林渡津程水溫陂接天池之餘派

仰湖噴玉珠之靈泉此則山川之文也至於雲霞雕色
草木賁華林籟結響秋濤激韻帆檣與鳧鴈交飛藻荇
將魚蝦共泳隨波上下凌風去來此則品彙之文也若
夫仰羲丹崖頽澡綠水汎覽吐曜劉察含章乘熙洽之
昌期聆周程之潤響引高論於曠代樹前模於來茲木
鐸啟而八方應席珍流而萬夫型此則天下之至文通
都之鉅麗所謂地因人重文起其衰者也故閣制上圓
象天下方效地圓則行而六秀通靈方則止而一泓返
照振千古斯文之氣萃四封光岳之英是豈俟於後時
端有望於今日蒞斯土者固且樂觀厥成繹斯言也尚

克襄乎茲美曰若率作興事播百姓之會和卜相掄材
標一方之勝槩例登名以鑑石集衆善而同歸永護巖
城聳飛高閣爰紀其事是用作歌歌曰維水之東巽風
是鍾城門洞開爰宅厥中南流括括激濺攸同水口靈
氣云胡弗崇諏日擇吉載瞻載營其未瞻止莽蒼漫漶
曰旣瞻止巽龍之幹其未營止修我陴岸曰旣營止俾
彼雲漢奠位文昌邑人之彥面城之勢截江之澄西塔
文華春口倚屏山輝水潤奕奕厥靈乘此扶搖九萬鵬
程願言譽髦聿觀有成

興國建修譙樓碑記

國朝置公署自畿甸以達郡邑郵傳無大小均設譙樓豈徒象魏是飭夫譙者望也爲高樓以望也或謂樓之別稱故美麗之樓亦曰麗譙其制昉於魏武於時予建撰畫角三弄李衛公於日出沒時鼓千槌凡三百三十爲一疊以應三角法爲定制所以警官僚夙興夜寐之思啟眊庶作息經營之志大有關於政事也興國肇邑自宋舊傳慶歷間程大中爲令嘗改作譙樓我朝景泰乙亥再建越今百五十年所而址圯屋陷遂闕西偏余適承乏三年來城闔樓櫓黌校倉庾名賢廟貌俱以久頽投艱於一身諸所脩繕無休歲復丁茲役心殊難之

以帑無贏資且不忍僦諸民僅捐俸錢先爲花材尚需以歲月會編圖冊山谷父老咸集倡義者謂令以我故不輕營營營私不急公者蓋亟圖無後於是下甃磚石上柱棟楹凡塼埴樸斲之工不戒徒庸而事集三閎月落成翬飛丹碧照映溪山起積廢於一新自慙杓之人何施於若民而厚獲孚惠耶幸際累洽之朝相與日勉於守成庶夙夜祇勤無負茲樓矣若時和歲豐民熙物阜肅賓僚而登茲樓臨眺山水從容詠歌竊有志焉而蒿目未遑也爰勒諸石用表諸父老名萬歷壬寅歲孟冬月吉日

王

芮字君生慈谿人興國知縣擢南通州知州

海忠介公祠堂記

粵忠介海公自浙之淳安移宰茲邑下車再朞而以民部召公之始去也老穉卧轍下擁公車不得行繪公像而尸祝之者遍闔闈無虛日初建生祠於尊經閣歲久祠廢乃迎公像合祀盧公祠焉直指按部者必遣官致祭多迎神公署未稱殊典歲丁未觀察龔公臨邑始檄視篆者議專祠而予適以計竣抵任乃謀諸父老卜地邑治之右東鄰府館西掖盧公祠深九丈有奇廣二丈有奇相宅度工人情欣躍功成不日中列三楹爲堂置

公像前坊後寢左右耳房庖湢具備復以餘貲修貢府館盧祠悉稱偉觀焉又以有祠無祀猶之未稱也乃以廢寺之田八畝九分及文昌閣之餘田七畝六分繼以田約之助田五畝八分又繼以罪鍰十金續置之而春秋之祀始饒矣邑之縉紳謂宜有記咸以請之不佞不佞謂主其議者龔公也今且轉轄全楚矣不佞何敢多讓惟忠介公鍾瓊海間氣爲昭代偉人其立朝建白凜凜有烈丈夫風而建節三吳總憲留都矯矯丰裁逝波可障貞心懋績自有史氏彤管不佞奚能揄揚萬一第就公之治興會不數稔去興亦且四十餘年先是家尸

祝矣建生祠矣既又白之當道祀名宦矣今觀察公一
議特祠而皆踴躍趨事豈有期會要結哉稽之祀典曰
有功德於民者祀之蓋公之來興也值辛酉兵燹之後
閭閻凋瘵公至而勞來安集之招徠離使復其業且給
黍麥之種而導之耕嗣是飛鴻來歸戶口漸實他如履
畝清丈以杜虛糧摧抑豪強以弭侵蝕樹木蒐圃以壯
軍容植松春日壩以培風氣異政未易更僕數也則公
之治興雖未數莠而澤惠已流於奕世去興雖四十餘
年而百姓之繫慕猶如一日宜乎興民之歌咏而不能
忘也嘗詢之邑中父老謂公去興後歷虔關者數四每

至必暫駐幃帷興民造謁不介紹而前家語戶誦語刺
刺不休而興民亦自公去後凡見鄉人必悉公動履伺
公安否以爲欣戚公誠興民之父母哉是役也始事於
七月之廿六日竣事於十二月之二十六日計瓦石塗
茨之工二千三百六十餘計竹木堊漆之費一百五十
四金至其議者嶺北觀察龔公效其勞者主簿章時吉
而奔走將事則父老鍾思孔胡鈞也公諱瑞號剛峯粵
之瓊山人終南京都御史諡忠介龔公諱道立號修默
吳之毘陵人若當道捐助及士庶義助者則別立之
珉云

郭子章

字相奎泰和人兵部尚書青螺集

興國縣四賢傳序

宇內山川之氣亡處亡之猶水在地中掘地皆泉卽水之或盈或竭莫能必也曲阜誕孔嶧陽誕孟今求之曲阜之域摻孔與孟必不可蹤然又惡知百世後之孔孟不誕曲阜也氣之盛衰循環類皆如是吾泰和與興國錯壤不下二百里興在唐宋人文濟濟入明以來科第稍詘語人物於章貢者始不及興卽與士人語唐宋人文猶杞與宋無足爲微而虔志興志亦董董畧不及詳予求之唐得鍾氏紹京以平韋功封越國公子嘉謬封

山陰縣公鍾氏書法繼繇埒王獨名於唐求之宋得李王二氏李蘄州潛以忠孝著子弟成進士者五能世其編修質侃侃言金人事於孝光二朝奏疏通達似賈長沙陸敬輿唐荆川太史右編收之甚富求之明得呂太常復詩歌上侶宋劉下友吾邑劉子高蕭正固亦稱名家予採而集之名曰興國四賢傳會予門人瀘州閔孝哉來攝興篆越公後裔自成來講業三顧又言予同年謝方伯公鳳渚源出興國予乃以傳畀之鍾托校於方伯托梓於孝哉而爲之申言曰予聞之君子之德風聞夷惠之風百世可師故令宰百里興起人文當有

所以風之子賤宰單父取魯君子子游宰武城得澹臺
生同時同聲師事友事幸甚不幸國無君子未得澹臺
當尚論其邑之古人以爲後進楷式信陵之墳守衛無
曠展季之壟樵蘇有刑任延都尉會稽先祠季子孫綽
出宰南昌著頌徐君况興國諸賢無愧往哲而令斯邑
者不爲之表章可乎故曰諷謠生於情托雅頌興乎所
欽此亦良有司之責也閔生乃與其僚何生其良校而
付之劓氏亦冀興邑當有聞風而興者

謝

詔號鳳渚贛縣人四川左
布政諡桓懿玉房山集

重修興國儒學記

平川之有邑也自宋太平興國七年始也其有學也自
置邑始也距今五百六十餘年創徙廢興之故載在邑
志諸記班班可俚指數矣嘉隆之際兩盧侯嘗一再修
之歲久而圯迄今朽蠹弗支至爲風雨所侵而榛莽所
翳也睠此賢聖之宇譽髦之林豈宜屑越若是蒞茲土
者顧瞻低回寧詎無意或以時誦而難舉羸或以逡巡
而重改作惟其身之得代而以遺後之人因而循之後
且復然卒之敝益日甚費益不貲所稱謹庠序之教者
當如是耶溫陵嶼梅吳侯自順德而移興國歲在萬曆
之辛亥侯夙負才名以文飭吏下車之始卽祇事廟學

睹茲窳壞有慨於中進多士語之曰某也不力辱在師帥惟是儲才養賢之所翦焉弗葺師帥之謂何撤其舊而新是圖是誠在我已又曰惟茲大役用徒實繁民信未施胡可使也曷少須焉踰年政通人和四境阜序侯曰可矣持前議就學博王君而與之謀謀既協迺畧基址迺程士物迺具畚築量工命日以授掌役自禮殿兩廡戟門櫺星門以及堂齋祠舍暨於庖廡以莫不飭拓湫隘於爽塏易摧剝以堅完加漫漶以丹堊廊庑陋爲閔麗周垣環繚棹榭高張巍然煥然咸備罔缺已又採形家言謂中衢稍欹水弗聚也地俯而下勢未昂也則

改路於東用迎生氣建敬一亭於高阜以象華蓋增卑益下攬秀擷奇地靈聖而人文開一方大觀於斯爲盛矣經始於壬子冬十月明年冬初遂告成事然其費出諸俸廩不以煩民力取諸僱置不以私役勿亟而成衆不知擾蓋由侯之才精敏強幹區畫周詳以故不疾而速如此今此多士嘉賴賢侯鼓篋絃歌樂有寧字先是侯嘗從閩中購集經史百家善本度學舍以資諸生誦讀諸生每月朔望肄瞻麾蓋蒞止泮宮啟函展卷北面而質疑問難厭飫於仁義道德之林沉酣於禮樂詩書之府幸藉般垂引之繩墨其所造就始與廟學而俱新

乎多士深德於侯聚族而謀所爲報其道無繇則請於
其師王君偕其僚謁予爲記以示來茲垂久遠予嘗考
覽史乘檢閱虔州人物所列興國爲多它亡論卽鍾太
傅李秘書兩家父子兄弟文雅忠孝繩繩競爽逮於雲
祢累葉猶然不墜門風在昔有聞聲光至今赫奕矣我
太祖高皇帝開天定鼎首以文學徵呂太常復入國子
已而受詔乘傳採勝國遺事於燕趙齊魯之間開局故
都繕帙進御敘勞受上賞超拜列卿何其盛也鍾聘君
磐當元泰定間教授成都士民尸祝國初臺省交薦高
皇嘉其行業特遣行人捧敕賚禮幣徵於家敦趣就道
名動天下若而人者夫非鄉校之所自出者哉列聖相
承文教熙洽今上壽考作人霑漑尤渥凡在山陬海澨
靡不沐浴道化以待標薪而况興國爲濂洛大儒開先
之地乎多士仰止高山景行有在得吳侯倡導鼓舞加
惠而作新之千載一時信非偶值闡山川之靈闕闡賢
雋之亨衢要亦天啟其機而人成其能耳多士旣丁从
鬱而通之會又因感激思奮之時宜必有跨前修而名
當世者出焉翊佐昌明之祚載錫邦家之光罔俾昔人
專美於前庶幾哉無負侯今日之盛舉已多士其勗之
哉余嶺人也先世居衣錦鄉實隸興國水木本源安敢

忘所自喜吳侯之大有造於此邦人士也故不辭而勉
爲之記侯名宗周字熙偉別號嶼梅福建南安人甲午
進士董是役者判簿義烏丁君一槐贊是役者學諭吉
水王君鉉若陳丞鴻濟蕭司訓賡王司訓三按則樂觀
厥成者云

鄒元標

字爾瞻號南阜吉水人左都
御史謚忠介太平山房集

龍興橋記

昔者先王愛民甚篤慮民甚周也備其不虞有司闕者
慮其道路有司阻者載在周禮纖悉備具如造舟爲梁
澳澆倚約之類見於經書者可考後復易爲石杠取其
堅固可垂永久民不病涉而又有形家因之以縮轂下
流爲人文地者此龍興橋議所由起也顧費鉅時誦遂
成道旁之舍會閩嶼梅吳侯來邑薦紳耆老文學卒史
復上其議侯聞欣然曰夫茲地蘊靈閎奇久亦下流空
洩之故且褰裳滅頂者歲見告吾何敢後遂聞兩臺使
及觀察守相感報曰可侯首蠲俸倡諸士民爭出貲應
計費數千緡經始於萬歷癸丑冬月至乙卯夏月告成
事修數百武廣四軌崇四仞稱壯觀矣諸生耆老某某
過而偕予姻友王博學鉉徵記予竊窺世爲吏者神情
必有所注注其下則慮周民隱注其上則窺矚爲工以

窺矚獲上者十之九卽邑事廢弛不服左右顧矣古人
得百里之地君之君者長也不但於斯民長之養之溺
饑由己於子弟才者教之成之如嚴父訓其子又慮其
無成也總總然思所成就之而翼於成此其心何如也
侯汲汲民隱是周又以澤民者造士所謂愷悌君子民
之父母者耶先是欲有事茲橋未果有童謠曰欲此橋
興待福安人民不知所謂今橋成始知侯爲福建南安
人神告之矣凡欲成不世之役者在先得民心得民心
而後能得其力今智者輸謀富者輸財能者竭力匪侯
深仁湛恩淪浹膚鬲欲民樂子來成功之速如是得乎
侯初令順德劔閣薇霄竟有魁天下者是橋舉多士從
此起矣昔崔雍州得美材數百章橋之人以名崔公橋
侯雖欲不尸其名不可得矣學博常述邑江山之秀草
木和柔月朗星麗偕諸生游泳其間不減沂雩風致予
雖老尚有志四方行當撰杖屨尋學博盟登茲橋一聞
樵者漁者歌侯之德澤乎侯名宗周字熙偉號嶼梅福
建南安人以名進士起家敬系之銘以永侯思銘曰漢
廷治行數吳公後先政蹟今古同驅石何年致海東跨
虹矯矯若游龍瑞氣鬱蔥如貫虹碧水丹山映遠峯苞
靈孕秀起豪雄千秋勒碣紀侯功

蔡鍾有

字恆卿同安人與國知縣

訓勤三章

文運家運其興替止在人精神振弛之間士精神振奮潛心大業不營分外以天下爲必可任古人爲必可期志之所至氣必至焉志氣交致直可前無古後無今而名成可坐策矣文運不卽此是興哉農工商精神振奮力本自食不營分外趨時如鷲鳥之發皇皇無一息之安功力旣專獲亦倍焉功獲相準直可使天不能災地不能貧而鉅積可立致矣家運不卽此是興哉振則興不振不興勤則振不勤不振人自不能勤而徒諉之運

何耶

平居習勉強棄怠惰併力精進鼓舞不倦當未見氣力之不足而究且磨煉則日堅勞苦則日強後來之幹大事享大福者必此能勤之人矣若平居厭煩苦好遊閑疎懶成性偷安歲月亦未見氣力之存剩而究且淫佚所自邪耽樂罔克壽後來之百無成一不保者必此不能勤之人矣是則勤不勤殊致而功用相反如此二者將安所擇耶

人能以攻苦致富貴者其自愛也必深其保持之也必以道故其居之也亦必長久縱有真勤苦而不富貴者

到底必有受用之處不於其身必於其子孫矣人富貴而不從勤苦得者其於幸也必爲屢徼其屑越之也必盡而其享之也終亦不久縱有極患失而幸圖存者到底有無故之敗逆天之常必犯天之忌矣今之不勤本業而賭蕩作奸蠱誘良民起滅詞訟因公嚇詐劫竊拐窩贖官作弊者皆其僥倖於旦夕者也從來無不敗露之奸近者目前遠者不過一二年三四年而一敗塗地矣豈若汗血苦心櫛風沐雨以力勤而致之者之有味而可久人亦何不反而思之也

女勤三章

爲貧人之妻而茹淡勤事愛時惜物則無饑寒之患矣
古人所謂家貧思賢妻也爲富人之妻而茹淡勤事愛時惜物則無敗落之患矣古人所謂賢婦令夫貴也是故與子粧奩不若教子女紅得婦盛資不若得婦勤事爲女子者而可不學勤乎爲父母者而可不蚤教以勤乎

爲人婦能攻苦勤事夫在足以成家立業翼子貽孫夫不在亦足以食力資身保子自存故凡婦之改節失身而以前夫之子仰面他人者皆其無自存之策者也然則婦而能勤不惟可以克家圖存而且可以完廉恥全

名節負綱常之重留萬古之芳勤之關繫於婦人顧不
 重歟
 勞則思思則善心生逸則淫淫則忘善忘善則惡心生
 此季氏賢母敬姜之訓也然不惟善不善之關而已每
 觀古今賢母其有子而以顯名者又多在能勤之家而
 其終於無子或以不賢子敗者又多在好逸不能勤之
 家是則勤不勤之間而子之有無賢不肖又皆係之勤
 何負於婦人哉不勤又何益於婦人哉

